



anyi? Ne pa kwela meeji ne “KuMumanya Yèyè, ki Mwoyi.” KuMumanya Yèyè, ki Mwoyi.

<sup>7</sup> Mpindyewu, màalabà dilòòlò, netwikalè ku Central Avenue Assembly, ngeela meeji ne ki mùdìbo bàkùbìkila. Mwanèètù Fuller, mukwàbò mwanèètù wa balùme wa maalu malenga. Ne ndi ngeela meeji ne ng’èkèleeziyà munène kuntwaku. Ne tudi pàmwàpa tutèkemena ne tudi mwà kwenza mulongo wà—wà babèedi, piikalàbi bimpè bwà Mwanèètù Fuller. Pa nàнку tudi. . .

<sup>8</sup> Ne pashìshe, dì—dindà dyàlondà, nebikengelè bwà twètù kwikala ku, ngeela meeji, utubò bàbìkila ne ng’Église Apostolique mu Phoenix emu. Kàdi ncyèna ànu mvùluka ne mpaasàtà awu, mwanèètù awu, nganyì to. Mvwakù cidimu cishààle anyi? [Mwanèètù wa balùme kampàndà ùdi wàmba ne: “To. Awu’s ng’èkèleeziyà mupyamùpyà, wa beena Mexique, Mwanèètù Branham.”—Muf.]

<sup>9</sup> Ne pashìshe mu dyàlumu dilòòlò ku èkèleeziyà wa Mwanèètù wa Mushinga mukole Outlaw eku, Èkèleeziyà wa Dìna dyà Yesù. Nènku ndi ne mwoyi wùzùka bikolè, ne dìkù dyànyì, bwà kubwelamù ne kuumvwakù yimwè yà ku misambu mimpè ayi.

<sup>10</sup> Billy Paul ùdi ne cyà kwikala muyìkwàte, yònsò, ku mwoyi. Tuvwa bimbè musambu awu wà ne: *Nèmbandè Muulu, Muulu*, too ne, bwà kwamba menemene, cintu aci’s cikaadi cyàmba kukùpuka cyònsò, pa mukàbà wà mèyì. Ùdi ùbangila mu birò amu, ne dìbà dyònsò dyà ku ditùkù pàndì nyakù, nànsha dyòdi dìbà kaayi, ùdi ànu ùwùtèeleja: “Muulu, muulu, muulu.” S’mbwalu bwa dikèma’s! Tukàadi bawìmbè bawìmbùlùle, ne mukàbà mwinè wùkaadi wàmba kunyanguka.

<sup>11</sup> Nudi bamanyè’s, mvwa bu mudyumvwaku dilòòlò edi, ne, dìyì ndimpàte ndambù, mèmè kudyàmbidila ne: “Èkèlekèle, ngìkalakù mwà kumòna muntu, mufwànyìnekù kuyiisha pa kaaba kàanyi,” kwenzekabì ne ntapè dísù kaaba aka ne mmonè Jack Moore. Cyà bushùwà ànu cyà menemene eci. Kacya ncitukù. . . Kaa, ngeela meeji ne aci ncifwànyìnekù kwikala ànu cilenga cyà dikèma’s, Mwanèètù Jack. [Mwanèètù Jack Moore udi wèla nsèkè—Muf.] Mpindyewu tèelejaayàaku aci.

<sup>12</sup> Ne ngeela meeji ne ndi mmòna Mwanèètù Roy Borders musòmbe apa, yèyè pèndè. Èyowà’s, mukalenge. Mwanèètù Noel Jones musòmbe kaaba aka. Kaa, ekèlekèle! Twètù’s tudi kwònsòkwònsò, myaba yònsò. Ngeela meeji ne ncifwànyìne kwikala cikondo cikumbàne, pàmwàpa, bu mèmè mwà kwikishakù ndambù, nudi bamanyè’s, ne kwangatakù bàmwè bàà ku bantu balenga aba bwà kubàndabò kaaba aka bwà kwakulakù pa kaaba kàanyi pàdi dìyì dimpàte, nudi bamanyè’s. Mwanèètù Jack ùvwa wàmba yèyè ne: “Mukalenge kèna mu adi dibuulula to.” Èè, mèmè’s mvwa mucyòke pàngàafikì apu.

Kàbidi's mvwa—kàbidi's ndi ànu mucyòke ndambù, kacya ngáfika.

13 Ne ndi mmòna bantu biimàne kuulu mwaba wàwa, ne mùdìbi bikèngela bwà kwikalabò biimàne kuulu, ne mu mùshindù kampànda ndi ne disànka dyà kwikala mwimàne kuulu pàmwè naabò. Mpindyewu, Mukalenge ànùbènèshè.

14 Nènku tudi mpindyewu bindile ne mwoyi mujimà makwàbò masangisha àcilwalwà awu. Ne pashìishe lumingu lùlwalwà elu neciikalè mu Assemblées Pentecôtistes, ne tutùngunuka. Ne tudi tukuupuka, mu dilòlò dya diisàtù dilwalwà, ku wa mu disangu dyà mùsèèsù wà 11 ne Garfield. Ncyènà ànu mwà kuvùluka byònsò abi mu meeji to. Ku, ngeela meeji, Première Assemblée de Dieu mu cimenga amu. Nènku—nènku pashìishe mpungilu ùdi ùbanga ku Ramada.

15 Nènku mpindyewu kùdi didyà bwà Beena Kantu-ku-byanza ku—ku cimenga cinènè cyà Arizona: Tucson.

16 Ne mu bushùwà bwà bwalu, tudi bònsò bamanyè Phoenix ne myaba mikwàbò ayi ne, yidi ànu ncyàmà yà cimenga aci. Ne aci ncyà bushùwà. Awu ki mwaba wà munène. Ki kwètù, nudi bamanyè's, pa nàнку, ne pa nàнку, kuulu kwà kakùnà. Nènku pashìishe eci, cidi ànu, mu mùshindù kampànda ncyàmà yàci, mòna's, mbilenga bwà kwikalakù neenù bu beena mutumba's, bwà . . .

17 Ngeela meeji ne ùvwa m'Mwanèètù Rasmusson, dilòlò kampànda, mwambè cintu cyà mùshindù awu mu disangisha, ne, kaa, ekèlekèle, cyambè kunyangakaja disangisha adi. Ngeela meeji tuvwa ku—tuvwa ku Houston. Ne ùvwa n'Ramsar. Ùvwa nyèyè's. Kwambayè, dilòlò dyàkapwekà Mwanjèlò wa Mukalenge, bakwàte fòtò adi, ki kwambayè ne: “Nwènú bònsò bàdì mwab'ewu bàà mu—mu Dallas emu aba,” yèyè ne, “twètù tutu bamanyè ne nncyàmà yà Houston.” Nènku, kaa, ekèlekèle! Texas kàvwakù mwà kucitwàla to, munùdì nwènú beena Arizona aba bafwànyìne kucitwàla amu. Ki kwenzekakù cinyàànyà cikolè mu disangisha amu.

18 Èè, Yèyè's mmwìmpè bikolè. Nènku mpindyewu ndi ngeela meeji ne netùbuululè mu Mifùndu kaaba aka, bwà tùfilè ànu kaabujaadiki kakesè cyanààna bwà katanci kakesè. Aci kì ncifwànyìnekù kucishintulula mu mùshindù kampànda anyì? Ndi ànu mutuutè mwambàkàje myaba yònsò bikolè menemene mu mùshindù wà ne nkaadi nguumvwa too ne bundù bwà kunùtàngila. Ne pàmwàpa kunùpakù ndambù wa diikisha, bwà kufila bujaadiki kampànda bwà bwìmpè bwà Mukalenge wetù.

19 Tùpetààyikù kaaba mu Yone Munsantu, nshapità wa 16 wa Yone Munsantu. Nènku ndi ne 16.12. Ndi njinga kubala kuumukila—kuumukila mu mwaba awu mu Èvanjeeliyò wa Yone Munsantu. Mèmè ntu muswè kubala Díyì, bwalu Díyì ndìdì ditùmanyishà ne m'Bulelèlà. Tubangila ku mvensà wa 12, nènku

tèelejàayi ne ntèmà mpindyewu, bwalu ndi muswè kufilakù bujaadiki.

20 Ne pashiishe netùteetèku bwà kubwela kumpalà kwà dîbà ndambù. Ndi ngenza ànu kunùlama too ne pashiishe. Nènku mààlabà dilòòlò, mònà's, netùshaalèku cyàbìbìdì cìmwè cyà dîbà ditenteka pamutù. Aci necitùfikishè ne pa dîbà umwe jaajaaja, kí mmwòmò anyì?

Pa nàнку, pa nàнку, eci cìdì cibanga ne mvensà wa 12:

*Ncìdì ne maalu àbúngì a kunwàmbila, kàdì nwènú kanwèna mwà kuàtwàla mpindyewu to.*

*Kàdì yéyè, Nyumà wa bulelèlè awu, pààlwàye, neànùlombòlè mu bulelèlè bwónsò: bwalu yéyè kààkudyàkwila yéyè to; kàdì byónsò byúmwwàye, kí byàmbàye: ne yéyè neànùleejè maalu àcìwwavwà.*

*Yéyè mpindyewu neàntùmbishè mèmè, bwalu yéyè neàpetè byà kùndì mèmè, ne neànùleejèbì.*

*Bintu byónsò . . . bìdì naabì Taatù mbyànyì mèmè; kí bwà cinyì ngám̀bì ne, yéyè neàngatè byà kùndì mèmè, ne neànùleejèbì.*

21 Nudi bamanyè's, makèèlèlè dilòòlò, nangàngà, tuvwa bapetè kacitembelu kakesè kàà cyòcì aci. Mpindyewu, bu mutùdì cisàmbà cyà beena Èvànjeeliyò mu Kaabujimà, tudi twitabuuja byenzedi byónsò byà Nyumà Mwimpè. Nènku mpindyewu, awu kí mùshindù wùmwèpelè wutùdiku mwà kwikala beena Èvànjeeliyò mu Kaabujimà, nkwitabuuja Èvànjeeliyò mu kaabujimà, byónsò bìdì Mukalenge mufunde. Ne ndi ngeela meeji ne tudi, twètù biinè, katwèna cintu to. Tudi ànu bu . . .

22 Ànu mùmvwà mwambìle Mwanèètù Carl, makèèlèlè awu, mutàngìle ku mucì kampànda, mèmè ne: “Dyàdya kí n'dibwè dyà ngajì dilenga anyì? Kàdì, twamb'eku twamb'eku, kadyèna ne bwà nsongo to cìdì ànu mushikì cyanààna wà butù bwà volcan. Kì cyónsò cidìku.” Kì mèmè ne: “Mùshindù mwinè wùdidi mpindyewu dishiilàngàne ne kàlàfuulù's. Èè, kàlàfuulù ncinyì? Butù bwà volcan, ànu ne mwoyi munda mwàkù cyanààna.” Kì mèmè ne: “Twamb'eku twamb'eku, mèmè ewu ndi cinyì ne wèwè awu udi cinyì? Butù bwà volcan, aci's mmenemene, byumùkile ku buloba; lupwishi lwà buloba, ne mwoyi munda mwàlù.”

23 Kàdì mwoyi wónsò mmukùnyìibwe kùdì Mufidi munène wa mwoyi, ne Yéyè ngudi mumanyè ànu mwà kwenza ne cyà kwenza ciinè. Ne byónsò bìdìYe mutèèke pa buloba apa bìdì bwà butùmbì Bwèndè. Mitootò yìdì bwà butùmbì Bwèndè. Mpeepèlè yìdì bwà butùmbì Bwèndè. Bilòngò bìdì bwà butùmbì Bwèndè. Ne twètù tudi dyashiibwa dyà cifulu dyà butùmbì Bwèndè.

24 Kàdì mbimwèke ànu bu ne byónsò mbiswè kuMutùmikila pa kuumusha ànu muntu. Muntu mmumwèke ànu bu ne . . . Mbimukolèle be, bwalu yéyè nguvwa cintu cìmwèpelè

cyàkadishindà. Bikwàbò byònsò byàkashàala mu ngiikàdilù wabi wa ku cibangidilu. Kàdi, muntu yéyè wàkadishinda. Ki bwà cinyi, Nzambi ùdi ùlwangana mvità bwèndè yéyè, bwà kumufikisha ku dyanza cidi cijaalàme, ne kutùmikila.

<sup>25</sup> Ne lùmwe lwà ku ntàtù yà mitàmbe bunènè bwà Nzambi, mu bidimu byònsò ebi, mùyaaya bwalu–bulonda bwà èkèleeziyà, mbwà kupetakù muntu kampànda udiYè mwà kutèeka mu bukòntononyi Bwèndè mu kaabujimà. Yéyè ùdi dijinga ànu ne muntu umwe cyanààna. Ùkaadi misangu yònsò mukwàte mudimu ànu ne muntu umwe ku musangu. Tudi balongè aci mu malòlò makesè àshàadi aa: muntu umwe, kî nkasumbù to. Yéyè ùdi dijinga ne muntu ànu umwèpelè. Ki cyònsò cidiYe naaci dijinga. Bwalu, bantu bàbidì mbafwànyine kwikala ne mmwènenu mishiilàngàne yibidì. Yéyè, dībà adi, ùdi wènza muntu ànu umwèpelè, ùDileejila ku muntu umwèpelè awu. Kacya Yéyè kàtukù mucyènzè mùshindù mukwàbò pa kuumusha awu to. Nwamònu anyi?

<sup>26</sup> Mpindyewu, Yéyè ùdi ne Mupèsonà umwèpelè leelù ewu, ne Mupèsonà awu n'Yéyè mwena bwalu butwáfumu ku dibala ebu: Nyumà Mwimpè. Yéyè ki Mupèsonà udi Nzambi mutùme, Nyumà wa Yesù Kilistò pa buloba, Nyumà wa Nzambi, bwà kumwènesha ne kwambidila patòoke Kilistò ku Èkèleeziyà Wèndè, nwamònu's, ànu bwà kutùngunukila ne Mwoyi wà Kilistò ku Èkèleeziyà.

<sup>27</sup> Mpindyewu, ncintu cyà cikèmesha be, kàdi—kàdi pààci ncipeepèle bikolè, bu twètù ànu bafwànyine kwimana ne kwelangana meeji. Tudi tukolesha, tudi tuzakalala, tudi—tudi tuciina, tudi tubwela mu dilubakana ne mpatà, twela ànu meeji. “Èè, ndi ne cyà kukolesha kubwela mu. . .?” Ki ng'aci to. Cidi ànu kudilekelela cyanààna, nwamònu's, umanya ne udi cintu cyanààna, ne uMulekela ùkwangata ku bukòokeshi, wàngata meeji èbè ku bukòokeshi, ùkòokèsha.

<sup>28</sup> Mpindyewu, ncyèna nswà kwamba ne nkuya kùdi Kilistò ne—ne mu—mu meeji ànu mutupù nànsha. Kì ng'aci cindì nswà kwamba to. Lwà kùdiYe ne meeji èbè mu òwò, ne mu meeji a—a—a kanyinganyinga, ne a didipwekesha. Ne pashiishe kwamba ne: “Mukalenge Yesù, ki mémè ewu. Mpindyewu, mbafunde mu Diyì Dyèbè emu ne, Uciwva ‘ne maalu àbúngi a kwambila bayiidi.’ Wèwè kwamba ne: ‘Kabàwva mwà kuàtwàla mpindyewu to.’” Ne pàmwàpa ki bwalu bwètù leelù ewu, katwèna mwà kubyùmva to.

<sup>29</sup> Nzambi ùdi mwà kujuula ànu kaacintu kakesè kàa kashiilàngàne, ne twètù tukàbenga mu kaabujimà. Pamutù pàa kukenketa Mifundu bwà kumòna ní nkàa cyà bushùwà anyi ní nkàa mafi, tudi tukiimansha ànu ne lùkàsà lwònsò ne: “Kakèena ne bwà nsongo to.” Bivwa bikèngela bwà twètù kukenketa bintu ebi, kujandula ní mbyà bushùwà anyi ní mbyà mafi. Nènku

vùlukaàayi ne, byôbì kabìyi byà bushùwà to, ndekeelu wa byónsò byôbì ne bifwe, bwalu Yesù wákamba ne: “Muci wónsò wùdì Taatù Wanyì wa mu Dyulu kàyi mukùne newùjuudiibwè.”

<sup>30</sup> Kàdi ndi ngeela meeji ne ùvwa n’Gàmaalièlè wákamba díyi dinène adi musangu awu ne: “Cyôci cyà kùdì Nzambì, katwèna baswè kusanganyibwa biikàle tulwishangana naaci to. Kàdi—kàdi cyôci kacyi cyà kùdì Nzambì to, kacýèna ne kwàyàci cyôci ciinè to.” Pa nànkù, cìlongàayi nwèlanganèpu meeji.

<sup>31</sup> Nènku mpindyewu, Yèyè mmwambè mwômò emu ne: “Kàdi Yèyè, Nyumà Mwímpè, pààlwàYe.”

<sup>32</sup> Mpindyewu, muntu kampàndà wákamba, kùkaadi cikondo kampànda, wákula, kwambayè ne: “Nyumà Mwímpè awu mu bushùwà bwà bwalu mmeeji èbè àudi udyèlela. Ngwèwè udi wela meeji awu.” Aci’s ncifwànyine kuvwija Nyumà Mwímpè ne mmeeji meela’s.

<sup>33</sup> Kàdi Bible mmwambè ne: “Yèyè...” Nènku “Yèyè” mupinganyi muleeji-muntu. Nwamònu anyi? Nwamònu anyi? “Yèyè,” Mupèrsonà awu, Nyumà Mwímpè, Nzambì, “pààlwàYe, neànùbuulwilè maalu aa, àngänwàmbidì awu.”

<sup>34</sup> Dìbà adi, nudi numòna’s, kakwènakù mùshindù mukwàbò wà kumanya cidì Bulelèlè to. Ànu ku... Kwèna mwa kucipetela ku nkolèshilù mulenga, ku malabula a ku sèminèrè to. Neùcipètèlè ànu ku Nyuma Mwímpè. Yèyè ngudi mutùmùbwe bwà kuCibuulula.

Mpindyewu, pashiishe, Wákamba kàbìdì ne: “Ne Yèyè neànùleejè maalu àcìvwavwà.”

<sup>35</sup> Mpindyewu, Ebèlù, nshapità 1, mmwambè ne: “Nzambì mu bikondo byà kale ne mu mishindù mishilèshilàngàne wàkaakwila ne baataatù kùdì bapròfetà, kàdi mu ditùkù dyà ndekeelu edi ku Mwànà Wendè, Kilistò Yesù.” Nwamònu anyi? N’Nyumà Mwímpè wàngata bukòòkeshi pa bwena cintu, anyi wàngata bukòòkeshi pa Èkèleeziyà, bwà kukwàta mudimu ne Kilistò mu Èkèleeziyà. Dìbà adi, wèwè udi ulwa mùvwàYe Yèyè amu. Yèyè wàkalwa mùvwà wèwè, bwà wèwè kulwa mùvwàYe Yèyè. Nwamònu anyi? Yèyè wàkalwa wèwè, bwà wèwè wamòna mwà kulwa Yèyè. Aci, n—ncitàmbe dymvwà. Kakwèna mùshindù wà kucyùmvwija to, ne wèwè kùteecikù bwà kucyùmvwija to. Cìtábè ànu cyanàànà. Yèyè mmuCyàmbè, ne aci ncikòse bwalu. Ambà wèwè ànu ne ncilelèlè, ùcìtábùùjè.

<sup>36</sup> Mpindyewu, kubangila ànu pàncìvwà mwena Kilistò wa citende, ntu misangu yónsò ànu ngamba díyi edi. Mvwa ne disànkà dyà mùvwà Nzambì mungangàte kumpàlà kwà èkèleeziyà kungangatayè. Mbikolè bwà kumanya cìmvwà mufwànyine kwikala. Kàdi mvwa—mvwa ne kusàkidila bwà bulombodi ne dipetangana dyà buludì divwà Nyumà Mwímpè mukèmèshe naadi nsòmbelu wanyì, kumpàlà kwà mèmè kumulekelela. Bwalu, mèmè pàncìvwà mwànà mukèsè, mvwa

mumanyè ne kùvwakù Cintu kampànda. Úvwà mwakùle, ne mèmè mvwa muyiikilàngàne Nendè. Yèyè úvwà ùngandamuna. Ki mèmè kubanga kumòna ne bintu byàkangambilà Ye, pàncivwà mwànà mukese apu, byàkabanga kwenzeka ànu menemene mùvwàYe mwambè ne nebyènzekè amu. Ki mèmè kumanya ne bìvwa ne cyà kwikala bilelèlà.

<sup>37</sup> Mpindyewu, nkàadi muntu mukùlumpè mpindyewu. Ne kacya musangu nànsha wùmwe ncitu—ncitu...Ne ndi mwà kwambila buloba bwà—bwà kwimanabù tëndè, ne kubàkonka. “Funkùnaayi munu cintu cimwèpelè cikaadiYekù mungambile, mu EMU MMÜDÌ MUKALENGE WAMBÀ, mu Dinà dyà Mukalenge, cìvwà kaciyi bulelèlà ne cintu cilelèlà cyà kakùyi mpatà to, ne kaciyi cyenzèke, pa misangu binunu kuvudija ku binunu byà bintu abi.” Ncinyi cidi cyenza . . .

<sup>38</sup> Ndi ngamba nàнку bwà cinyi? Nwamònu’s, s’ngàmbì mutùdì twètù bònsò lupwishi lwà volcan. Kàdi mmulayi wà Dìyi dyà Nzambi. Kì bwà cinyi, ncyèna mwà kudyeyemena mèmè mwinè to. Kwèna mwà kwikala ne dyeyemena mu wèwè mwinè to. Kàdi, bònsò pàmwe, tudi mwà kweyemena Cidi cyangàte bukòokeshi kumutù kwètù twètù biinè. Nyuma Mwimpè ngudi mutwángàte ku bukòokeshi. Tudi ne cyà kweyemena Cyôci aci. Ne patùdi tweyemena Cyôci aci, dîbà adi bipeta bìdi bìlwa.

<sup>39</sup> Mbifwànyine kupità mutù bwà mèmè kuteeta mene ku—kunwàmbila nànsha byà pamutùpamutù bimwè byà ku bintu bìdi Nyumà Mwimpè mwenzè mu nsòmbelu wanyì sungasunga wa mucibùlùke ewu, mu matùkù àànyì. Ndi ngamba nàнку ne Bible Wendè ewu mubuulula, Dìyi Dyèndè. Ne ki cidiYe. Yèyè ùdi Dìyi.

<sup>40</sup> Nwamònu’s, Dimiinu edi—edi didi dibwela mu butù bwà volcan, mu mùshindù wà Kampànda wa nyumà. Nzambi ùdi ùbwela bu Nyumà ne ùkwàcila mudimu ku butù. Pa nàнку, kì mmuntu to. N’Nzambi.

<sup>41</sup> Nènku bu ne bìvwa binkèngela bwà mèmè kusòmbelakù panshì, ne kwangatakù dîbà dyà kufùnda bintu binkaadiku mèmè muMumòne mwenzè, s’mbifwànyine kwenza mipimbu ne mipimbu yà mikàndà. Ne pa kucyèlela meeji, kaaba aka, ne bidimu makùmi àtaanu ne bisàtù, ne mwikàle mwà kwamba kumpàlà kwà Nzambi, kwà Èkèleeziyà Wendè, ne kwà Bible, mwisù mwà kasumbù aka, ne: “Musangu nànsha wùmwe ncitukù mwanji kuCimòna cipangile to; ànu mu byòbi menemene, musangu wònsò.”

<sup>42</sup> Pa kuumushà, ànu ditùkù adi dîngàakalwà mu wesètè. Nukàadi beelèèle mukàbà wà méyi, bààbúngì bàà kunùdi, ngeela meeji, nudi nuumvwa. Ncyèna mumanyè ne ncinyi to. Ndi mwindile. Ndi mùneemu mpindyewu. Ncyèna mumanyè ne mbwà cinyi to. Ndi ànu mwindile.

43 Cidi mwà kwikala dyalukila dyànyì dyà kumbèlu. Bidi bitàmba kumwèka mùshindù awu. Byòbì nànkù, nekùjuukè muntu kampànda paanyimà pàànyì, watùngunuka ne Mukènji. Yèyè awu neikalè muntu wa pabwèndè, kàdi neàjuukè paanyimà pàà cyòci eci ne neàtungunukè ne Mukenji. Nènku ikàlaayi bacitèèlèje. Pàdici ciikàlè Mifùndu, nùshaalààyi naaci.

44 Byòci kabìyi nànkù to, kùdi kùlwa cikwàbò citùpà mpindyewu, bwalu ndi ngiitabuuja cyà bushùwà ne tudi ne mwoyi mu matùkù a ndekeelu, ne ndi ne kusàkidila mùndì mwikàlè ne mwoyi mu ditùkù edi. Ncyènàku mufwànyine kushintakaja ditùkù edi ne ditùkù nànsha òmwè to. Edi nditùkù dyà ditàmbe kwikala dyà butùmbì dikaadiku pa buloba. Kakwèna ditùkù dikwàbò nànshà òmwè dikaadiku ditàmbidila ditùkù edi to.

45 Kaa, cìvwà Mòsà, Eliyà, Pòlò, Siilà, bilòbò binènè byà diitabuuja abi, bafwànyine kwenza ncinyì mu matùkù àkapità awu, bu bòbò mwà kujuuka ne kwambula mukàndà wà maalumalonda, ne kutàngila ànu menemene byàkambàbo mu bipròfetà abi, byènzeka, ne kumòna mwaba wutùdi tusanganyibwa mpindyewu ewu? Mòna's, s'mbafwànyine kubèèla mu bùloko, mu dîbà òmwè. Cyà bushùwà's. S'bàvwa bafwànyine kwikala bu bantu batombòke, bàbànda bàpwèka ne mìsèèsù, ànu ne mwàbò mwònsò, bàtonoka ne Èvànjeeliyò. "Dîbà dikaadi pabwìpì." Dîbà adi's nyewù tumòna, dilòlò edi ne, tudi bapangile ànu menemene butùmbì bwà Nzambì.

46 Kàdi ndi muswè kwambululakù ànu cintu cìmwè, bwà mu mùshindù kampànda kufikishakù èkèleeziyà . . .

47 Byòbì biinè, Billy Paul mmwabànye twartà twà disambila mu èkèleeziyà emu dilòlò edi anyi? Ncidi mfùminakù ku Tucson kwènji tusunsà tukesè. [Muntu ùdi wàmba ne: "Èyowà."—Muf.] Mm—mmwabànye twartà. Mpindyewu, aci neciikalè mùshindù mubi be wà kuteeta bwà kubatwàdilakù. Netùcìteetè's.

48 Mpindyewu, ncyàkwangata dîbà dipitèpìte bùngì to, ndi mfilà ànu bujaadiki cyanààna pa Mufùndu ewu.

49 Bwà ne, Kìlistò ùtu ànu ùshààla mukwàte ku Méyì Èndè. Ùdi ne cyà kwenza nànkù. Ùdi ne cyà kucyènza. Nwamònu anyi? Mémè ncyènà ne cyà kucyènza to; ndi wa cifwàkà, ku bukòokeshi bwà bilèma. Yèyè ngudi kàyì mwà kufwà, kàyì mwà kupangila to. Yèyè ngudi ne cyà kushààla mukwàte ku Èndè. Nwamònu anyi? Kàdi kí mmémè udi ne cyà kushààla mukwàte ku àànyì to. Kí ngwèwè udi ne cyà kushààla mukwàte ku èbè to. Kàdi n'Yèyè. Kaa, aci kacýènakù cinùtèèka cintu kampànda munda amu anyi, bwà kumanya ne kakùyì mpatà to Yèyè ùdi—Yèyè ùdi muswikiibwe ku Dìyì adi?

50 Nènku, aci, lumingu elu, mùshindù mwinè wutùdi bendè mu Bible mujimà, ne bapròfetà abu ne bankambwà, ne musangu wònsò tuleeja ne pàvwà èkèleeziyà ùseesukakù, Nzambì ùvwà



ùtùma buludì muntu kampànda ne ùbànyùkusha ùbààluja cyàkàbìdì ku Díyì adi, ùtèèka èkèleeziyà mu njila. Ki mùtùbi misangu yònsò. Awu ki ngenzèlù wa Nzambì. Yèyè ùtu musungùle bantu bwà kwenzabò nàнку.

<sup>51</sup> Mpindyewu, bu ne Wàkasungula mìtootò bwà kuyiishayì Èvànjeeliyò, nùнку's ncyenzèke kùkaadi ntàntà mule. Kayìvwakù mifwànyine kupàtuka mu diswa Dyèndè to. Bu Yèyè musungùle dí—díbà bwà kumuyiisha, anyì mpee—mpeepèlè bwà kumuyiisha, kabìvwakù bifwànyine kupàtuka mu diswa Dyèndè to. Nwamònu anyì?

<sup>52</sup> Kàdi twètù tudi pa cishìmikidi cyà budìshikaminyì bwà disungula. Twètù tudi mwà kwenza maalu mutùdì baswè kwenza amu. Ne ki bwà cinyì tudi balwè kùdiYe bu disaamà dyà mwoyi dyà dikèma. Mìsangu yònsò mùshindù ewu, ne baswè ànu kwikala kwelamù mìshindù yètù twètù, ne tuseesuka ku Yèndè njila. Nwamònu anyì?

<sup>53</sup> Ne nkàadi—nkàadi mwambè kacya kwònsò eku ne, muntu ùtu díbà dyònsò ànu ùtùmbisha Nzambì bwà cidìYe mwenzè. Nè ùtu misangu yònsò ànu wàmba bwà cyènzàYe. Kàdi pashìishe, pa díbà dímwèdímwè adi, mwikàle ùlèngulula cidìYe munkaci mwà kwenza. Nwamònu anyì?

<sup>54</sup> Muntu neàmbe ne: “Kaa, Nzambì wàkakàngula Mbù Mukünze. Èyowà's. Butùmbi kùdì Nzambì! Ncyà bushùwà.” “Èyowà, Yesù ùlwalwa cyàkàbìdì. Alèluuyàh! Ncyà bushùwà.” Kàdi, bwà kwamba Bwèndè leelù ewu? “Aa, aci cìvwa mbwà ditùkù dikwàbò.” Nwamònu anyì? Nwamònu anyì? Mìsangu yònsò ànu bwà cikaadiYe mwenzè, cyènzàYe, kàdi ùlèngulula cidìYe munkaci mwà kwenza.

<sup>55</sup> Ngìikàdilù yimwèyimwè ayi nyàakasanganà Yesù Kilistò pààkalwàYe pa buloba. Menemene's. Nzambì ùvwa mulayè cyàkenzàYe aci. Kàdi ki Yèyè awu, mwimàne kumpàlà kwàbò, kàdi bôbò kabàyi baMumanyè to. “Yèyè ùvwa pa buloba, ne buloba bwàkenjiibwa kùdiYe, kàdi bàà pa buloba kabààkaMumanya to.” Ncyà bushùwà.

<sup>56</sup> “Kàdi bònsò bààkaMwakidilà abu, Yèyè wàkabàpa bukolè bwà kulwabò bàna bàà Nzambì.” Ki luseke lwà butùmbi ndwòlò alu.

<sup>57</sup> Kùkaavwa cikondo kampànda, cikèènà-kumòna cikesè kampànda cìndì muswè kunùlondela eci. Kàdi ncyèna mumanyè to, pàmwàpa ncitu mwanji kucyàmbakù to ànu kùdì muntu umwèpelè mwaba kampànda. Kàdi ndi—ndi mufùme ku dijimija umwe wa ku bantu batàmbe bunèna pa buloba ebu, bwànyì mèmè, mààmù wanyì.

<sup>58</sup> Ne mèmè ntu—ntu munangè mààmù wanyì. Mùshindù mwinè wùmwà mmumòna ùmuka ku mèèsà, patùvwa balanda bàà dikèma, katùyikù ne cyàkudyà nànsha cikesè to! Nènku yèyè. . . Papa ùvwa ùlwa ne màmpà, mwaba wùvwàye

mukakòmbe mu màkàjiinyi kampànda, anyi cintu kampànda, ne—ne bàvwa bàpòngolwelapù kàfè, ne pashiishe kwelapù nsùkaadi. Nènku mààmù ùvwa wènza bu uvwa kàyi ne nzala to, bwà twètù bânà twamòna mwà kupeta cintu cyà kudyà. Kaa, ncitu—ncitu mwà kupwàku cyòci aci mwoyi to. Nwamònu anyi? Ne búngì bwà misangu yìvwaye ungambula, ne bintu biinè bìvwaye ùngenzela's. Kàdi, nudi bamanyè's, Nzambì mm—mmùle ànu tètè ne luse be. Yèyè ùtu ùmvwa maalu ónsò awu, pàdibi bikèngela bwà kubyàngataYè. Ne mèmè—mèmè ndi muMunangè bwà cyòci aci.

<sup>59</sup> Bitù misangu yònsò, ne, kumpàlà kwà yònsò wa ku bàà mu fàmiyè wanyi kufwaye, ntu ncimòna kumpàlà kwà kwenzekaci, mu cikèèna—kumòna.

<sup>60</sup> Ngàkamòna mwanèètù wa balùme, pàncìvwa ne bidimu bu dikùmi ne mwandamukùlù cyanànanà, anyi dikùmi ne citèemà. Ngàkamumòna kumpàlà kwà kufwaye. Ncìvwa nànsha mwena Kilistò to, kàdi ngàkamòna cikèèna—kumòna aci cilwa kumpàlà kwànyì, mèmè kumòna mwanèètù wa balùme awu ùya.

Ngàkamòna tààtù wanyi pàakafwaye.

<sup>61</sup> Howard, bààbúngì bàà kunùdi mbavùlùke Howard. “Howard,” nudi bavùlùke's, bidimu bìbìdi kumpàlà kwà kwenzekaci, mèmè kwamba ne: “Howard, ndi mumòne mwaba wèbè mwenza cimanyinu. Wèwè ngudi ulonda.” Mèmè ne: “Dilongòlòle, mwanèètù, bwalu wèwè ngwìkala mulondèle ku diya.” Ne wàkaya, ànu menemene. Ne pashiishe, àbìdi àdi panshi aa. . .

<sup>62</sup> Mpindyewu, ndi ntèkemena ne eci kacýèna cyùmvwika bu cyà cinyanga cijila to, kàdi, ànu bwà kuleeja mùdi—mùdi bwalu bùtwa Nzambì ku mwoyi. Nzambì ùtu misangu yònsò ànu wàngata ne mushinga tuumaalu tukesè, mùshindù wùm>wè>wùm>wè ne maalu manènè. Ndi muswè kwamba eci bwà kutwà nyama ku mikòlò bàmwè bàà ku bayiishi balenga aba. Bàdi pàmwàpa. . . Ne mèmè mwinè ndi ndyèlamù.

<sup>63</sup> Mpindyewu, twètù, muntu ne muntu, tudi bafwànyine kuswà kwikala Billy Graham kampànda, kàdi tudi. . . Ne muntu ne muntu tudi bafwànyine kuswà kwikala Oral Roberts kampànda. Kàdi, twètù, katwèna Billy Graham anyi Oral Roberts kampànda to. Tudi musadidi kampànda wa Nzambì mu budimi mùdiYe mututèèke. Nwamònu anyi? Nànsha ciikàle cikesè bìshi, anyi cinènè cyà bìshi, cìdi ànu cyà mwomùm>wè ku mèsù kwà Nzambì, misangu yònsò anu byà mwomùm>wè, bwà kwenza maalu mu ówò mu mwaba mene wùdi usanganyibwa awu. Misangu yònsò, cìdi ànu cintu cinènè bwà kulonda Mukalenge.

<sup>64</sup> Mbipicìibwe ne mèmè mupetèle. . . anyi muyè kapeta èkèleeziyà mwikàle ne bantu makùmi àtaanumù, mu diswa dyà Nzambì, pamutù pàà kuya kapeta bantu binunu bitaanu kabiyi mu diswa dyà Nzambì to. Bushùwà's. Nzambì ùdi mwà

kwenza bipite ne muntu mu diswa Dyèndè, mu dîbà dimwèpelè, kutàmba bìdiYe mufwànyine kwenza ne muntu udi kàyi mu diswa Dyèndè, mu bidimu makùmi àtaanu. Nwamònu anyi? Yèyè udi ùlènduka ne ùtetuka, byenzè bu udi utuucila cingoma mu midimà. Kàdi pàdi muntu bulelèlà mu diswa dyà Nzambì, ne mumanyè dibìikila dyèndè, bìvwa bikèngela kwikalayè musòmbèle mwaba awu.

Nènku mpindyewu, bikèènà-kumòna, mùshindù wùdi Mukalenge Nzambì ùkwàta naabi mudimu. Mémè. . .

<sup>65</sup> “Yèyè, Nyumà Mwímpè awu pààlwàYe, neànùbuulwilè maalu àNgânwàmbìdi aa.” Mpindyewu, kabyèna bikèngela bwà kuteeta kudifwànyikijilaci, mùshindù mukwàbò kanà wònsò to. Yèyè ki MwenaDì. Bìvwa cyà bushùwà bikèngela kumanya cidiYe mufùnda. Nwamònu anyi? Bible mmwambè ne Yèyè ngwàkaCifùnda. “Nànsha bantu bàà kale, basàkiibwe kùdi Nyumà Mwímpè, bààkafùnda Dìyi.” Ne piikalàbi ne Nyumà Mwímpè m’Mwena Dìyi adi, s’ncyà bushùwà ne Yèyè mmumanyè mwà kuDyùmvwija bìmpè kutùtamba twètù. Mulekèlaayi Yèyè ènzè dyumvwija dyàDì. Ne nudi bamanyè ne mmunyi, mùshindù wùdiYe ùDyùmvwija anyi? Mpindyewu, bintu ebi kabìnùpicikù to panwikalà balwè mu disangisha dyà dyondopa. Tàngilàayi. Eci kacìnùpici to. Yèyè ùdi ùDyùmvwija bishi? Ku nunku ewu, pa kuDishindika, nwamònu’s, ùDivvwija nàнку awu.

<sup>66</sup> Ki cyàkambà Yesù. “Kenkètaayi Mifùndu. Mu Yòyi amu mmunùdi nwela meeji ne nudi ne Mwoyi wà Cyendelèlè; kàdi Yòyi ayi’s ki Yidi yàmba ne Mémè ndi Nganyi. Yòyi ayi’s nyidi yiNgamba. Nènku nganyi udikù mwà kuMpiisha? Nganyi udikù mwà kuMbanda bwà mpèkaatù?” *Mpèkaatù* mbwena kwamba ne “bupidyà.” “Mémè nciyi ngenza byenzedi byàkafundiibwà bwà bwalu Bwànyi to, dîbà adi kanùNgiitabùùji to. Kàdi Mémè ngenza byenzedi, kàdi nwènù kanùyi mwà kuNgiitabuuja to, nàнку itàbùùjaayi byenzedi, bwalu Dìyi dyà—dyàkacyàmba.” Nwamònu anyi? Aci’s cidi ànu cyumvwidi cyètù cyà ciibidilu, cyà matùkù ònsò eci.

Mpindyewu, Nzambì: “Mapà ne mabiikila kî mbyà dinyingaleela to.” Tudi bamanyè ne ki cidi Bible mwambè. Kî mbyà dinyingaleela to.

<sup>67</sup> Kùkaadi bu, pàmwè ne bidimu bibìdi mpindyewu. Mvwa. . .Dindà kampànda mvwa ngenda ngenda mu—mu nzùbu, ne mvwa musòmbèle mu nkwasà. Mpindyewu, eci cidi cyùmvwika cyà pabwàci, bwà ne Nzambì mmufwànyine kubadilamù ne nyama. Bu mwanètù wa balùme kampànda wa mushinga mukolè, pa cikeènà-kumòna cyà Dyulu aci, cyà kaadyambwibwa kakesè kâmpetèlè aku; ngeela meeji ne nkààvwa munùlondèlekù, musangu kampànda, anyi mu disangisha kampànda. Úvwa mumfùndile mukànda ditùkù adi, wàmba. . .Dìyi dyà Beena Kantu-ku-byanza bààkacipàtula.

Yèyè ne: “Cìvwa...cìkèèná-kumònà cyèbè aci cìvwa cìmpè, Mwanèètù Branham, ditentemunyibwa dyèbè adi. Kàdi, tèèlejà, cìvwa cìmpè too ne pawàlu kwamba ne kabalù kèèbè, kawùvwàku mubànde musangu kampànda aku ne, kàakalwa kukutèèka mutù pa dikaaya.” Yèyè ne: “Kakwèna tubalù mu Dyulu to, Mwanèètù Branham. Dyulu ditu dyenza bwà bantu, kí mbwà tubalù to.” Èè, mèmè kudyàmbidila. . .

68 Èè, pa ciibidilu, udi umòna muntu kanà yònsò wa mùshindù awu, bikèngela ùmvwijè bintu byònsò, yèyè ùdi ùteeta ànu bwà kwangulakù cintu kampànda. Nwamònu anyi? Kwèna mwà kuumvwijakù Nzambì to, nànsha bìshi. Bikèngela ànu ùMwitabuuje cyaanàna.

69 Kàdi ncifwànyìnekù kumukànkamika. Mèmè ne: “Mwanèètù, ncitukù mwambè ne mvwa mu Dyulu to. Mu cìkèèná-kumòna amu, ngàkeela lukonko bwà Yesù, ne bàakamba ne Yèyè ùcìvwa dyàmwàmwà dyà mwaba awu. Mèmè mvwa mu ngiikàdilù mwenzè bu mu mpàlàdiizò. Kàdi, bwà kukukwàcishaci, Bible mmwambè, mu Mukàndà wà Bwàkabuulwibwà, ne: ‘Yesù wàkafùmina mu Maulu a maulu, mubànde pa kabalù katòòke. Ne cilwilu cijimà cyà mu Maulu cìvwa cyènda cìMulonda, pa tubalù tutòòke.’ Pa nàнку twòtù tùdi ne cyà kwikalàmù mu Maulu a dyulu amu.”

70 Nzambì ùtu ùtùma ntèmà ku bintu byònsò. Ùtu ùtùma ntèmà ku tuntu tukesè tùtù wenza, anyi bintu binène byùtu wenza abi. Yèyè ùtu ùtùma ntèmà ku mùshindù wùtù wèwè ukùba kasumbù kèèbè kakesè kàà mikòòkò aku, anyi mùdi wèwè mukwàbò awu ukùba bisumbù byèbè binènè byà mikòòkò abi. Ùtu ùtùmakù ntèmà.

71 Kwènjì cikondo kampànda, mulundà wanyì mulenga mumanyike bìmpè, tuvwa ku. . .tulòba mu mwaba kampànda. Mèmè, mvwa mufùme ku masangisha, ne mvwa mwikishe. Tuvwa munkaci mwà kulòba ne tuunyonga, ne bakwàte mishipa yà mikumbàne cidiilu. Nènku dilòdòlò adi tuvwa tulòba ne ndòbò yà misangì yà ndebèlè, kàdi kupangila bìshì byà kwela ku ndòbo. Ku mèbà mapite mu mapingaja, mèmè kuya bwà kawkwà tunsèlèlèngà, tuumishipa tukesè menemene atu. Kwèna mwà. . . Yà minène ayi udikù mwà kuyìdya, kàdi etu tùdi ànu tuumishipa tukesè twà dyela ku ndòbo. Nènku mèmè kwela ndòbo, ntùpula ndòbo, ntùkwàta, ntwèla mu mbekeci.

72 Ki Cintu kampànda kundengaci, mèmè musòmbe pa bwàtu ebu. Nsongàalùme ewu ùvwa Ntèmù wa Yèhowàh, ne mwanààbò wa balùme ùvwa ùfùma ku disùngidiibwa ne ku dyujiibwa ne Nyumà Mwimpè, nènku nsongàalùme yibìdì ayì yivwa neetù. Nènku pàmvwà munkaci mwà kukwàta mishipa eyi apu, twètù bònsò, Cintu kampànda kundengaci. Ki mèmè ne: “Nudi bamanyè’s, nekwikalè dibìishiibwa kampànda dyà ku lufù, bu mùdi kanyama kakesè.” Èè, kanyama kakesè.

<sup>73</sup> Mpindyewu, bààbúngì bàà kunùdì mbavùlùke dipàtuka dyà Díyì, òvwa dyambè ne: “Kùvwa mwà kwikala mwàna wa balùme mukesè ùvwa mwà kubìika ku bafwè, uvwa mutuuta ku màshinyì.” Mwanèètù Jack Moore ùdi naanyì dilòlò edi, uvwa mu Finlande pàvwa bwalu abu bwenzèke. Nwamònu anyì? Bààbúngì bàà kunùdì mwab’ewu mbavùlùke pámvwa mucilonde kaaba aka, nwamònu’s, nnwàmbila bwà kucifùnda mu tùlipè twènù. Mònaayi.

<sup>74</sup> Ki Mwanèètù Wood kukùdimukayè, Mwanèètù Banks Wood, mwena mwàna wa balùme, uvwa mwondòpiibwe tunèkè awu. Ki kukùdimukayè e kwambila mwanààbò wa balùme ne: “Tàngilá wèwè ànu cyanààna. Cintu kampàndà cìdi pabwípì ne kwenzeka.” Mémè kutùngunuka ànu ne kukwàta mishipa, nwamònu’s. Nènku tuvwa twela tunsèlèlèngà atu bu bìshì byà ku ndòbo.

Bufùku abu katwàkawkàta kantu to.

<sup>75</sup> Pàakacyàbu mu dindà mémè kwamba ne: “Kùvwa ndambù, búngì buvùmvùke, bwà tunsèlèlèngà muntwamu.”

<sup>76</sup> Yèyè ne: “Ambà tǔng, byòbì biinè, kwám̀bìpu mwab’ewu ne kùvwa mwà kwenzeka dibìshiiibwa kampàndà dyà ku lufù?”

Mémè ne: “Èyowà’s.”

<sup>77</sup> Ndi nnwàmbila ne, pàngùmùkù kumbèlu, bòbò bàvwa . . . Mwanàanyi mukesè wa bakàjì . . . Tudi bu mùdì . . . Nwènù nudi mwà kwikala naatù panwìkalà baswè, mpindyewu, nwamònu’s, kàdi mémè ntu ne bwòwà bwà kampuusù. Nènku mémè ncyèna—ncyèna ànu muswè cyuyùya cyà byenjenji bikwàtakaja bitùku bwàtù abi to. Nènku katùtu twètù naatù kumbèlu to, ne—ne ntu ngiitabuuja ne kampuusù kàdi mwà kumanya ne mémè ntu naaku bwòwà. Pa nànkù, díbà adi, bàna bàanyi bakesè bàà bakàjì bàvwa bamanyè bìmpè ne kabàvwa ne cyà kwikala ne tumpuusù kuntwaku to. Ki mukesè . . .

<sup>78</sup> Mwanàanyi mukesè wa bakàjì ùvwa wènda wèndela mu kajila ne mwàna mukesè mukwàbò wa bakàjì, ki kwalukilayè, ne dibungama kwìsù kwònsò, ki kwambayè ne: “Papa?”

Mémè ne: “Udi ukèba cinyì, munanga wanyì?”

Yèyè ne: “Kùdi cintu cibi be cyenzèke.”

Mémè ne: “Ncinyì ciinè aci?”

Yèyè ne: “Bu wèwè nanshà mumanyè’s!”

Mémè ne: “Èè, ngambilaaku tǔng.”

<sup>79</sup> Yèyè ne: “Muntu mmwimànshè kàmwè kampuusù kakwàte ne byà luse mu kajila emu.” Ki yèyè ne: “Kakwàcikwètù aku’s kàdi kamba kufwà, kapangè too ne mwà kwenda.” Ki yèyè ne: “Papa, udi umòna bishì bu twètù mwà kukàpèeshakù byàkudyà ne kukàkùba?”

<sup>80</sup> Mémè ne: “Kakwèna bwalu to. Wèwè muswè kukàpèèsha byàkudyà, wikalè ànu mudimùkè’s. Kakàlu kukwela nzàdi.” Mémè ne: “Enzà ngǎnji mmonèbi kampuusù aku.”

<sup>81</sup> Nènkù pààlubù ne kampuusù aku mwaba awu, mémè kwangata kashèètè, ne, mu bushùwà bwà bwalu, pàakacyàbu mu dindà twètù kupeta musùmbà mujimà wà tumpuusù twànà.

<sup>82</sup> Ki pashiishe, pa nànkù, mwanàànyì wa balùme mutekète—mutekète, pánkaavwà nguumuka, Joseph mwànà awu, ùvwa ùtùbandila. Kaa, kwelayè meeji ne tùvwa tulenga kumòna, nudi bamanyè’s, mùvwàtu túbànda myaba yònsò ayi, nudi bamanyè’s. Nènkù—nènkù kwangatayè kàmwè mu cyanza; kukàbòndayè bikolè ndambù, kàdi kukèèlayè panshì pa dibwe dyà nshààmendè apu. Kalùmýànà aku kubangakù kènda kànyùnguluka, kunyùnguluka. Mémè kudyàmbidila ne: “Kaa, ekèlekèle!”

<sup>83</sup> Ki mémè kudyàmbidila ne: “Èè, mpindyewu, kàdi mwà kwikala kànà kakesè kàà kampuusù aku, pàndì ngaalukilu kumbèlu apa.” S’nudi bavùlùke bwalu bwà opossum awu. Mémè kudyàmbidila ne: “Èè, nkafwànyìne kwikala kampuusù kànà aku.” Pa nànkù dibà adi tuvwa basòmbe mu kaacijèngù kàà màyi amu, munkaci mwà kulòba, ne tuvwa dîbà adi tukwàta tunsèlèlèngà twà bunène bukùmbàne atu, twaluja twà tukesè menemene atu mu màyi.

<sup>84</sup> Mwanèètu Lyle, mwakùnyèndè wa Mwanèètu Banks awu, ùvwa ùlòba ne mucì wà ndòbo wà nshinga mujìngila ku cinu, ne ndòbo munène menemene, ne musùmbà munène wà misànda myelakù. Kuminyishayè kansèlèlèngà kakesè aku ndòbo ne kukàpwekayè too ne mu kafù kàakù kakesè aku. Kàdi mmwenzè ànu ùkàtùpula nùnkù, kwambayè ne: “Mpindyewu, ndi njinga bwà nwènu kutangila *kwàka*,” kiikàle ànu bule *ebu*. Nènkù ùvwa ànu... Kàvwa mwà kupàtula ndòbo awu to, ngeela meeji. Kakùyi mùshindù mukwàbò to; ànu kukòsa nshinga awu. Kàdi yèyè ùvwa muswè kulama ndòbo wèndè awu. Pa nànkù kupàtulayè ànu byà mu dibòdi, kafù ne byònsò, mu kòkò aku, nùnkù *ewu*, ne kukàkùpayè pa màyi. Ki kòkò—kòkò kuzakalalakù misangu yìsàtù anyì yìnaayi kàdi kushàalakù ànu kalààle mwaba awu. Awu kwambayè ne: “Bwèbè mbutùùke, kalùmýànà wa yàayà.”

<sup>85</sup> Mémè kwamba ne: “Lyle, pàdìku kàbanga kudiila... Angàtà ndòbo mukesè mushààdile kù awu nànkù. Pàdìku kàbanga kudiila, wàngatè mucì wà ndòbo wùdi mulàdika apa ewu, ne pàkaadìku ànu kàbanga kudiila, ùkàkwàtè. Wamònu anyì? Kumpàlà kwà kòkò kumukwàta ne kumumina, ùkàkwàcìlè ku tushìku aku.” Mémè ne: “Ki mùshindù wà kwikala kutùkwàta naawù ngwòwù awu.”

<sup>86</sup> “Aa,” mwàkambàye, “ndi mukòke bibì,” pèndè ùmba ùtùngunuka ne kulòba. Ki kuteetayè misangu ndambù,

kàdi kupangilayè misangu bu yisàtù anyì yìnaayi nàнку awu. Kì kutèékayè cilumyànà aci panshì, kwambayè ne: “Nènkàminyìshèci ànu kàbìdi.”

<sup>87</sup> Kì kaamushipa kakesè aku kushààlakù kalèlème pa màyi apu ndambù, kaa, ngeela meeji, tusunsa makùmi àsàtù. Kì mavwala kubangawù kubànda ne kubwela.

<sup>88</sup> Mèmè ne: “Èè, nebìkengelè bwà twètù kuumuka mu katanci emu. Tukàadi ne mbekeci mujimà mpindyewu, nàнку nebìkengelè bwà twètù kuumuka.”

<sup>89</sup> Kì mèmè kujuuka, bwà kukàkùpa paanyimà pàà mabèji a mbata, bwà kukimansha kule. Kùvwa tùmwe twà ku tufù tukùnze paanyimà apu. Nèнку mèmè kubanga, kukòka cì—cì—cìshì cyà ku ndòbo aci pa mabèji apu, nudi bamanyè’s, kuciimansha pa dibèji adi, kàdi kucidyàpula, munùdi nwenù balùme ne bakàji bamanyè maalu a dilòba amu.

<sup>90</sup> Kàdi pàngàabangì kwenza nàнку, dyàkàmwè, Cintu kampànda kupwekaCì cipicila pa tukùnà atu, ànu mùtù Lupeepèlè lùpòngoloka amu. Ne kulwaCì pambidi pàànyì. Mèmè kumacìsha mucì wà ndòbo awu panshì, ne kujuuka e kwimana mu bwàtù amu. Kì mèmè kukènzakana. Mèmè kuumvwa Dìyì dyàmba ne: “Udi umòna kaamushipa kakesè aku anyi?” Nèнку kì kòkò kàka, kalààle mwaba awu.

<sup>91</sup> Mèmè ne: “Nudi numòna kaamushipa kakesè aku anyi?” ànu mùvwàYe Yèyè mucyàmbè amu. Mwaba awu tuumisààlálà twàkù atu tukaavwa tuuminyine, ne kàvwa, kalààle pa màyi munda mwà citùpà cijimà cyà díbà. Nèнку Bible ewu nyewù mutèeka mubuulula mpindyewu. Nwamònu anyi?

Kì kwambaYè ne: “Akùla naakù, ne kàpèèshùlùlè mwoyi.”

<sup>92</sup> Kì mèmè ne: “Wèwè kaamushipa kakesè, mu Dìna dyà Mukalenge Yesù, ndi nkupèèshulula mwoyi.”

<sup>93</sup> Ne bantu abu biimàne, batàngile. Kaamushipa aku kukùdimukilakù pa nyimà wakù, ne kàbwela mwinshì mwà màyi nkòkò kàyaaya kàka. Kwambabò kuuminyina’s. Lyle kwowayè màyi kwìsù. Kwambayè ne: “Nènshiishè kubiika ku tulù paanyimà pàà katanci.” Yèyè ne: “Ndi—ndi mumanyè ne ndi munkaci mwà kulòota.”

Mèmè ne: “Kwèna munkaci mwà kulòota to.”

<sup>94</sup> Ne ànu pa díbà dìmwèdìmwè adi, ngeela meeji ne, pa mènà a bàà disambidila, mvwa ne bânà makùmi àsàtù anyì ànaayi bàvwà ne disaamà dyà tukùlákàji. Ne mùshindù mwinè wùvwàku Nzambì mufwànyine kucìnguluka, kushiya bânà bàà disaamà dyà tukùlákàji abu, kàdi kujuula kaamushipa kakesè’s, s’bidi ànu bìleeja ne Yèyè ùdi ùtùma ntèma ku bintu byònsò’s.

<sup>95</sup> Bwà cinyì bùvwàYe mufwànyine kukwàta mudimu ne bukolè Bwèndè bwà kwela mucì wà mfigì mulawu, pàvwàku binunu ne binunu byà beena nsudi mu ditùnga amu? Kàdi kucìngulukaYè

beena nsudi abu e kuya keela mucì wa mfigì mulawu, ne kwamba ne: “Muntu nànsha umwe kàdikù cyèbè cimuma to,” ne mucì wà mfigì awu kufùbidilawù. Mukwàte mudimu ne bukòlè Bwèndè, ùleeja ne Ûtu ùtùma ntèmà ku micì. Ûtu ùtùma ntèmà ku mishipa.

<sup>96</sup> Ûtu ùtùma ntèmà kùdì wèwè. Ûtu ùtùma ntèmà kùndì mèmè. Ne Ûtu ùtùma ntèmà ku kumòna Dìyì Dyèndè òmwèneshiibwa, ne Yèyè ùtu mutùtèkèle twètù mwoyi bwà kucyènza, bwalu twètù tudi beena mudimu Bèndè. Katwèna ciintu nànsha cimwè mu twètù nkààyeetù to. N’Yèyè; tudilekelela ne twenda pàmwè Nèndè.

<sup>97</sup> Mvwa mumòne cikèènà-kumòna mu dindà adi. Mèmè kumòna nyama munène mulààle ku luseke lwà kakùnà. Kaa, ùvwa ne nsèngù yibìdì minènaanènààlè. Mvwa mu lwendu lwa dilemba nyama mu ciinè cikèènà-kumòna aci, lwà pa díbà bu dikùmi anyì dikùmi ne ùmwè wa mu muunyà. Kì mèmè kudifinda e kwasa nyama awu.

<sup>98</sup> Ne pashiishe mu njila wa dyalukila, ours munène wa lwonji mufikùlùke kujuukayè buludì bwà kundwisha, kàdì mèmè kumwasa.

<sup>99</sup> Ne pashiishe mèmè kubàmòna bàngata nsèngù ayi, ne cyànza cikesè kwololokaci e kukwàta nsèngù ayi, kutèkapù mètre wa dipima nendè. Lusèngù lùvwa bule bwà centimètres lukàmà ne mwandamutekètè, kuumukila ku ntàku too ne ku lusongo lwà lusèngù, centimètres lukàmà ne mwandamutekètè mu butùmbùke. Kacya ncìvwakù mwanjì kumòna nyama wa mùshindù wàwa to, ne nsongo minène ku lusèngù lwèndè aku. Kàdì, pèndè, ùvwa ànu bu kashà kalùme’s, kàdì kòkò kàvwa, kaa, ekèlekèle, kènza bu tushà tùbìdì anyì túsàtù. Kacya ncìvwakù mwanjì kumòna cintu cyà mùshindù wàwa to.

<sup>100</sup> “Èè,” mùngààkambà, “pàmwàpà cyàdyàkwenzeka dīngà ditùkù’s. Nèngànjì ànu kucifùnda.”

<sup>101</sup> Mèmè kuya ku Kentucky ne mulundà wanyì kampànda, ne Mwanèètù Miner Arganbright kumbiikilayè, wàmba ne: “Mwanèètù Branham, udi ne mudimu wà dyenza anyì?”

<sup>102</sup> Mèmè ne: “Kì nnangànangà to.” Mèmè ne: “Mvwa muyè mu. . . Ndi ne mbingu yibìdì mpindyewu. Ndi mu kaadiikisha kakesè.”

<sup>103</sup> Yèyè ne: “Lwàku lùkàsà tùye ku Canada, ku Alaska, ne mèmè. Tudi baswè kwenza dyàpà dyà Beena Kantu-ku-byanza ku Anchorage ne ku Fairbanks kàbìdì.”

Mèmè ne: “Bidi byùmvwika bimpè be, bu mèmè mwà kwikalakù ne cikondo cyà kucyènza.”

<sup>104</sup> Yèyè ne: “Èè, Mwanèètù Branham, bu wèwè mwà kucyènza, nènkwambilè mùdì bwalu, netùkupètèshè dilemba dilenga dyà ours munène wa lwonji mufikùlùke.”



105 Mémè kudyàmbidila ne: “Kaa, aci’s cidi cyùmvwika címpè.” Mémè kudyàmbidila ne: “Kaa, kaa, s’ki cikèèná-kumòna aci’s. Nwamònu’s, s’ncyôci aci’s.”

106 “Dilemba dilenga dyà ours munène wa lwonji mufìkùlùke,” mûngààkambà, “aci’s cidi cyùmvwika címpè. Ncyèna nya bwà aci to. Kadi, patwikalà tukàadi kuntwaku, bu bàmwè bàà ku balombodi mwà kuswà bwà kuyakù naanyi, kabiya byà difuta mfrangà to, nêngìikalè ne disànkà dyà kuyakù.”

Pa nàнку, yèyè ne: “Èè, bôbò—bôbò nebàcyènzè. Tukàadi bamanè kucìlongolola.”

Mémè ne: “Èè, mpindyewu anjì indilabi túng. Ngǎnji kusambila pa bwalu abu.”

107 Ki mémè kuya mu diitu diinè ditùkù adi, ne musangu wònsò wùmvwà nsambila, mvwà nya kule naaci, díbà dyònsò, ànu kule naaci menemene. Mémè kudyàmbidila ne: “Ebu bwalu’s mbwà pabwàbù.” Ki matùkù àbìdì paanyimà pàà cyôci aci, mémè kubìikila Mwanèètù Arganbright. Mémè kwamba ne: “To.”

108 Yèyè ne: “Mwanèètù Branham, pèètu ànu munkaci mwà kulongolola bintu.”

109 Mémè ne: “Kanùcyènji to. Nyumà Mwímpè wàcipiishi.” Ki mémè kumulondela cikèèná-kumòna aci. Mémè ne: “Ncyèna—ncyèna mumanyè to, Mwanèètù Arganbright, kàdi mbwalu bwà pabwàbù’s. Kàdi Yèyè kààkundekela nya kuntwaku to, kàdi, pààbì, bìdì byùmvwika bu ne—ne mbifwànyìne kwikala wòwò mwaba awu.”

Ki yèyè ne: “Èè, mpindyewu, twètù bònsò’s tukàadi badìlongòlòle bwà kuya.” Ki mémè ne . . .

110 Mpindyewu, bààbùngì bàà kunùdì nebàmonanganè ne Mwanèètù Arganbright. Yèyè neàlwe kaaba aka mpindyewu, bwà kudìlongolola pàmwè naanyi, bwà kuya dyàmwàmwà dyà mbù paanyimà pàà disangisha edi. Nènku nudi mwà kumukonkàayi bwalu abu. Ki twètù kwamba . . .

Mémè ne: “To. Ncyèna ànu mwà kucyènta to. Nyumà Mwímpè mmungambile bwà ncìcyènji to.”

111 Mbitàmbe bwímpè bwà kutùmikila, nànsha byôbi bìshi, nànsha cyôci cimwèka címpè cyà bìshi. Nènyiishè pa cintu kampànda cyà mùshindù awu mààlabà dilòòlò, bu Mukalenge mwà kwanyisha. Pa nàнку mpindyewu, vùlukàayi ne, nànsha cyôci cimwèka címpè cyà bìshi, pìikalà Nzambì kàyimu to, shààla kule naaci. Nànsha cyôci cimwèka cyà cibàlakana bìshi, shààla kule naaci. Nànsha cyôci cyà cìtanta bìshi, shààla kule naaci pìikalà Nzambì kàyimù. Shààla kule naaci. Mpindyewu netwìkalè mwà kwakulapù mààlabà dilòòlò, bu Mukalenge mwà kwanyisha.

112 Mpindyewu, pashìishe pàngààkalukilà kumbèlu, Billy, mwanàanyi wa balùme awu kungambilayè, wàmba ne: “Pàpa,

udi mumanyè cilembi ùvwà muyè nendè mu bulembi kuntu kwàka mu movù wà bintu bitòloka mushààle ewu, dínà dyèndè Southwick awu?”

113 “Kaa,” mûngààkambà, “lwà ku...mu...kwinshì kwà Yukon kwàka?”

Yèyè ne: “Èyowà.”

Yèyè ne: “Mmukufündile wèwè—wèwè mukàndà kaaba aka.”

114 Yèyè awu m’Mwanèètù Eddie Byskal, udi mfùmù wa—wa kasumbù kàà bambi kàà mu ditungà dyà ku nord-ouest kwàka, nsongààlùmè mulenga be, ùdi mwà kwikala kaaba aka mu disangisha emu. Ùdi munkaci mwà kulongolola bwà kulwa lwà kùneeku musangu ewu. Nsongààlùmè mukesè mulenga be, ne ùdi ne dîkù dilenga. Ùdi—ùdi wènza bumpandanjila kuntwaku mpindyewu ùya ku ba-Crees, ba-Indiens bàà Cree. Nènku mvwa nendè ànu mu movù wà mabèjì àpòòpoka mushààle ewu. Ne pashìshe . . . Anyi, mu movù wà luuyà mushààle ewu’s wè, èyo.

115 Pashìshe yèyè, Eddie, ùvwà muswè bwà kuya naanyi kwà Bud, uvwa umwe wa ku bàdiye mukùdimwishe mucimà kùdì Kilistò awu. Mukàjèndè ùvwà mwena Mpenta wa lulamatu lwà menemene. Bud ùvwà mwena ferme kampànda, ne mmufùme ku dilwa ànu àbìdì àdì panshì aa. Kàdi bààkamukòsela, mwaba wùvwàbo biipàte ba-Indiens ne bakabàtèèke mu citùpà cyà buloba cibàlamina awu, citùpà cinènè cyà buloba bwà bulembi. Cìipacila yìsambòmbò...Kaa, ngeela meeji ne mmupeté cipaapu cyà kilomètrés carrés nkàmà mwandamutekète ne makùmì mwandamukùlù, anyi mipìte apu, lwà mwònsò amu, citùpà cyà buloba cimukòsela kùdì bukalenge bwà Canada.

116 Èè, mu movù wà bintu bitòloka awu, pàmvwà kuntwaku apu, twètù kuya mu bulembi bwà ours paanyimà pàà disangisha, kàdi patùvwà . . . mu ngondo mwitànù, kàdi lupeepèlè lwà luuyà alu kulwalù kutùpangisha. Tuvwa ne . . . Yèyè kacya kàvwakù mwanjì kuumvwa cintu pa bìdì bitàngilà masangisha to, kàdi Eddie ùvwà ànu mutùngùnùke ne kumwicikijila maalù a mu masangisha.

117 Ki yèyè ne: “Udi muswè kungambila ne, leelù ewu, Nzambi udi munkaci mwà kuDileeja, ne kuleeja maalù àcilwalwà kumpàlà kwà kwenzekawù anyi?”

Eddie ne: “Aci’s ncyà bushùwà menemene.”

118 Ki kutùngunukayè ne kwakula naanyi. Yèyè ne: “Udi mumanyè’s, mèmè ndi ne mwanèètù wa balùme udi ne dĩaamà dyà ciseki.” Yèyè ne: “Bu wèwè ànu mwà kufikakù kùdì mwanèètù awu’s!” Yèyè ne: “Ndi ngeela meeji ne, bu mèmè mwà kumufikishakù mu dimwè dyà ku masangisha èbè awu, ndi ngeela meeji ne mmufwànyìne kwondopiibwa.” Mèmè ne. . . Yèyè ne: “Ùdi naadi nkacya bààmulela.”

Mémè kwamba ne: “Pàmwápa mmùdibi’s.”

119 Èè, kwìsù kakùtu kùfùika kuntwaku mu cikondo aci cyà cidimu to, nudi bamanyè’s. Dìbà dìdi ànu dipweka cyanààna, ne dilwa . . . Kaa, nudi mwà kwikala, pa dìbà kanà dyònsò edi, mundankùlù, dìbà ùmwè, udi ànu mwà kwikala mwimàne, ubala cibèjibeji, cintu kanà cyònsò, wamònu’s. Kàdi lwà—lwà ku citùpa cyà ndekeelu cyà ngondo mwitànù dìbà kadyèna dibwelakù to. Didi dyùmuka, dyàmba kuya, bwà tusunsa tutwè ku dikùmi, ne dyàlukila. Pa nàнку tudì ànu tudyàdija panshì dìbà dyònsò ditùdi tucyòka adi.

120 Ki pashìishe mu njila wa dipàtuka amu, twètù kutwilangana ne musumbà wà ba-Indiens. Nènku, kaa, mémè kupeta mfùmwbò wa kale awu kuntwaku. Bàvwa bamushiye kuntwaku bwalu ùvwa ne bânà bàbidì. Bòbò bàtu bàjiika bààbò bânà mu citùpa cyà mucì, bananga bààbò. Ntèndeleeleu wa mùshindù kampànda. Ne bàtu bàbàkùdika ku mucì, nènku bàtu ànu bàshìya fàmiyè awu ùshààla mwaba awu. Mukùlumpè mulenga wa dikèma, mupìte too ne pa bidimu makùmi citèemà, musòmbe bimpè pa cisòmbedi cyèndè cya kabalù ànu mùdi umwe wa ku bânà bèndè bàà balùme abu.

121 Nènku twètù kwasa lwendu pàakacyàbu. Yèyè ne: “Kakwèna njila wa diyiila dyàmwàmwa mpindyewu to. Bàndilàayi ku luseke lukwàbò lwà mikùnà kàdi nùyiilè *eku*.” Kaa, cìvwa nntàntà mukwàbò wa kilòmèetà lukàmà ne makùmi àsambòmbò, bwà kukòsa kajila aku. Pa nàнку, twètù katùvwakù bafwànyine kwenza aci to. Dìbà dikaavwa diyè bikolè. Twètù kwalukila cyànyimà.

122 Nènku mu njila wa dyalukila amu, Bud ùtu ne mulongo wà tubalù twànà, ne tùmwe twà ku twòtù tùvwa tukabwelè mu cisènsè ne bikwàbò. Nènku mémè mvwa ngenda nyakù, biikàle tuyiikila, Eddie ne mémè. Ne Bud ùvwa pa kabalù kalombodi, ùteeta kupàtuka. Tuvwa ne tubalù makùmi àbidì ne kàmwè. Ne mémè mvwa mwelè kàmwè mwonji, mémè kukàpàtula. Kàdi nkenzè ànu kàpàtuka, dìbà adi kàànyì kabalù sungasunga kubwelakù mwòmò amu. Nènku ki mémè awu, mpàtukamù. Nènku mvwa ne bitocì pambidi ne byònsò. . . Mu tusunsa tukesè, mémè kubànda pa kabalù kàànyì, ne kukùpula bitocì ku bilàmbà, mùshindù *ewu*, kwasa lwendu.

123 Kàdi buludì kumpàlà kwànyì, ku luseke lukwàbò lwà kakùnà kwàka, kulwakù nsongàalùmè wa citende. Mémè kumutàngila. Mémè kudisàka paanyimà pa cisèbà cyà kusòmbela apu ne kwimanyika kabalù kàànyì. Ne mémè kumumòna ùpaluka, ùcyènza misangu ne misangu, ne ùpàtula ntutu ku mishìku, kulwayè ne madyàmbi a menemene, ne ùsùnsula byònsò. Ki pashìishe kuditùujayè. Mémè kumòna dicyùwà dyà kale. Mémè kumòna mutèèlù wèndè wòshika mudilu.

124 Eddie ùwva pabwîpî ne cyàbibîdî cimwè cyà ntàntà wa kupîta misèsèsù yîbîdî kumpàlà kwànyî, úteeta bwà kupeta kabalù kakwàbò. Kabalù kàà kànà kàvwa kaseesúke mu kajîla, kàya mwómò amu, kàkòka majîtu kule nendè, kàkàndamana. Ki díbà adi mêmè kuya lubilu kùdî Eddie aku. Twètù kutuuyîsha kabalù aku. Mêmè kwamba ne: “Eddie, ndi ne EMU MMÛDÌ MUKALENGE WÀMBA bwà Bud.”

Yèyè ne: “Mwanèètù Branham, cyènzèkî ncinyî?”

Mêmè ne: “Cìkèènà-kumòna. Ngàmònu mwanààbò wa balùme awu.”

Yèyè ne: “Kaa, kamwangàtè.”

125 Mêmè kwamba ne: “Lamà tubalù paanyimà. Nènsalulè kàànyî mêmè mpîtè kumpàlà, ncingulukè lubilu tubalù etu, mmonè ní ndi mwà kutùpeta ne kutùlamina ku luseke lwà kakùnà.”

126 Mêmè kunyùnguluka mabwe matùmbúke awu, nùнку ewu, ne kabalù kàànyî-...pa kabalù kàànyî apu. Mêmè kukàsàka kumpàlà, ne kufika pòpò apu. Ki mêmè kutèeka cyanza pa cisèbà cyà cisòmbedi aci. Mêmè kwamba ne: “Bud?”

Yèyè ne: “Yè, Mwanèètù Branham.”

127 Mêmè ne: “Ndi muswè nkwambilèku bwalu kampànda. Mwanèènù wa balùme . . .” ki mêmè kuumvwîja mùvwàye.

Yèyè ne: “Èyo. Udi mukwambile nganyi?”

Mêmè ne: “Muntu nànsha umwe. Mukalenge ngwafùmu ku dimundeeja.”

Mêmè ne: “Udi mwà kungiitabuuja mêmè bu musadidi Wendè anyî?”

Yèyè ne: “Cyà bushùwà’s, Mwanèètù Branham.”

128 Mêmè ne: “Mubiikidishè,” mu ntàntà wa wîpacila—wîpacila ku kilòmèètà cinunu ne nkàmà yîbîdî ne makùmî mwadamukùlù kule ne bantu, “ambilà mwanèènù awu àlwe mwaba ewu. Ne musangu wà kumpàlà wènzàye úmwè wà ku mpalù ayi. . .” Mêmè ne: “Úkaadi mwenzè mpalù eyi nkacya pàcivwàye ne bidimu bitwè ku bibîdî. Wèwè udi mufwànyine kubènga kuciitabuuja, kàdî ndîsaamà dyà pa mukishî. Kakwèbè mulùme ùwva naadî.”

Yèyè ne: “Mpindyewu, aci mbulelèlè. Ncyà bushùwà.”

129 Mêmè ne: “Mpindyewu, nsongàalùmè ewu pènzàye mpalù ewu, ùmukòpwèlè mutèèlu paanyimà ùwùkùpè mu mudilu, wamba ne: ‘Ndi ngenza nùнку mu Dîna dyà Yesù Kilistò, bilondèshile Dîyî Dyèndè.’ Kààdyàkwenzakù mukwàbò mpalù to, pìikalàye ànu ùciitabuuja.”

130 Kwelayè ànu byanza muulu cyanàànà, kubangayè kwela mbilà mikolè. Kwambayè ne: “Kacya ncitukù mwanjî kucimòna cyenjîlbwe to, kàdî ncyà bushùwà ne wèwè udi mungambile

ànu menemene mùvwà mwanèètù wa balùme, ne mungambile bulelèlè pa bìdi bitangilà kakwányi mulùme.”

Mémè ne: “Aci ncyà bushùwà.”

<sup>131</sup> Paanyimà pàà twètù bamanè kuumuka, kubiikidishayè mwanààbò wa balùme awu. Kàdi ùvwa ne cyà kuya kakòsa mupwa mu dindà adi, pàakafikàye ku bis (utu ulwa, ùpita misangu yìbìdì anyi yìsàtù ku lumingu, ùbànda ùpweka ne cibeeba cyà mu Alaska aci), kufikayè ku . . .

<sup>132</sup> Kàdi mukàjì wa Bud, Lila, ùdi ànu kaamuntu kakesèè, mukàjì mukesèmukesè, wa bunènè bwìpacila kapeeyilà kàà nsàbangà paanyimà pàà díkù dimanè kusukula naakù bilàmbà. Ànu mukesè. . . Mmulelè bânà bàtaanu, mwikàle mukàjì mukesè wa kalolo.

<sup>133</sup> Nènku ki Bud kupàtukayè bwà kalongolola tubalù twèndè atu, bwalu ùvwa ne cyà kuya kakòsa kajila aku, bwà twamòna mwà kwalukidilamù pàmwè ne bilembi byèndè.

<sup>134</sup> Nènku mmwenzè ànu ùya, èè, mwanààbò wa balùme mwòmù amu, kàyi mwanjì kukòpola bilàmbà byèndè byà bimpè abi to, kupalukayè. Kàdi bàvwa basòmbèle mu citùdilu mu kampònyì kàà kale, mùvwà beena Àmérique, pàvwàbo bìibaka cibeeba, bìikàle naakù kuntwaku. Nènku pàvwà. . . Bàvwa ne dicyùwà dinène dyà kwipikila. Nènku Lila mukesè awu. . . Yèyè mulùmyàna awu ùvwa—ùvwa wènza maalu a dikèmà pàvwàye ùpaluka. Ne mukàjì awu ùvwa ùmuumvwa bwòwà wàmba kufwà, ne ùvwa mwà kuumusha didìdiishì, anyi kwenza *cintu kampànda*, ùmuka mu njila. Kàdi kubangayè kutùpika bwà kupàtuka, kàdi kuvùlukayè cìvwà cyambìibwe aci. Ùkaavwakù mu òmwè dyà ku masangisha, ku Dawson Creek kwàka.

<sup>135</sup> Kuyayè lubilu mwaba awu ne kwelayè mulùmyànà munène ewu mu mantàntà, kumukòpwelayè mutèèlu lwà paanyimà, mwikàle ùdila mwadi, mbòta ne byònsò, mutèèlù wèndè mutòòke awu, kuyayè ku dicyùwà aku, ne kwambayè ne: “Ndi ngenza eci mu Dìna dyà Mukalenge Yesù, bilondèshile Dìyì dyà Mukalenge divwà ditwàmbila.” Ne kàakapalukakù musangu mukwàbò nànsha wùmwè to kacya ànu piinè apu. Aci kukòsaci bwalu.

<sup>136</sup> Ùvwa mumbiikidishè bwà kulwa bwà kalemba nyama, kabìyi byà difuta mfrangà to. Nènku ntu misangu yònsò ànu nkèba bintu byà kabìyi byà difùcila mfrangà abi, nudi bamanyè’s. Ki mémè kudyàmbidila ne, “Èè. . .” mungàakambà, “nènye. Nèngànji kumòna Mukalenge ní wàngaanyishila bwà kuya.” Mémè kusambila. Ne ndi mwenzè ànu nsambila anyi, byònsò kuyabi ànu mu mùshindù awu.

<sup>137</sup> Mémè kwangata Mwanèètù Fred Sothmann. Ùdi mwaba kampànda mu disangisha emu. Ùdi penyì, Fred? S’ki bwalu mbwòbù abu. Èyowà. Yèyè ngumwe wa ku balubuludi bàà èkèleeziyà wetù. Mwanèètù Fred mmumanyè ne cyòci eci

cyākambiibwa ngondo yisàtù kumpàlà kwà kwenzekaci. Ncyà bushùwà anyi, Mwanèètù Fred? Nènku, ngeela meeji, Mwanèètù Simpson. Mbanganyì mu citanda emu dilòòlò edi bàdì bamanyè ne kumpàlà kwà kwenzekaci, cyākambiibwa? Elàayi byanza muulu. Ki bôbô aba's. Ne civwa cyambiibwe kumpàlà kwà èkèleeziyà, ànu menemene civwà mwà kwenzeka. Èè, ncivwa mumanyè ne eci ki civwà cikondo ciinè to.

<sup>138</sup> Pa nàнку mêmè kuya ku cibeeba cyà—cyà mu Alaska, ne Mwanèètù Fred kwimanyikilayè pàà mulundà kampànda, bwà kuya kalemba ngulungù yà mpàndà. Nkutàmbe bule kuntwaku bwà ngulungù yà mpàndà. Pa nàнку tudi mu citùpà cyà buloba cyà mikòòkò, mutùvwà tuya amu. Ne pa nàнку twètù. . . Mêmè kwangata ka—katùpà kàà—kàà lupèmbà anyi bitoci, ne kufùnda pa lumwènù lwà kumpàlà kwà kàshinyi alu. Mêmè ne: “Mpindyewu, Mwanèètù Fred, pa nàнку piikalàbi ne eci ki cikondo, neùvulukè ànu menemene ciikalàci.” Ne yèyè mmucivùlùke.

<sup>139</sup> Mêmè kubànda. Dilòòlò adi patwàkabwelà mu citùùdilu, Bud kwambayè ne: “Mwanèètù Branham!” Yèyè kunguupukila ne kutùpikayè ùya muulu wàlukila, wàkula mu myakulu ne ùtuuta mikòbòlo, nudi bamanyè's. Kwambayè. . . Nènku aci, mulami wa kale wa ngombe wa pa kabalù wa makòyi, yèyè pèndè. Nènku ù—ùvwà ànu munkaci mwà kutùmbisha Nzambì's. Yèyè ne: “Udi mumanyè mùdì bwalu anyi, Mwanèètù Branham? Mwanèètù wa balùme awu kàtu mupalùke to kacya ànu ku mwinè musangu awu. Ùkaadi ànu mùdì bantu bônso emu ne mubidi tumatuma, kacya ku cidimu cishààle.”

<sup>140</sup> Mêmè ne: “Piikalàye ànu mucitàbùùje, nebitungunukè mùshindù awu.” Ki mêmè ne: “Mpindyewu ùmwambilè àlekelele mwoyi wèndè kùdì Kilistò, ne àMukwàcilè mudimu matùkù èndè ónsò a mwoyi. ‘Ndà kàdì kwènji kàbìdì mpèkaatù to, cyanàànà cintu citàmbe bubi necimwenzèkèlè.’ Wamònu anyi?” Mêmè ne: “Ùmwambilè ènzè nàнку mpindyewu.”

<sup>141</sup> Ki mêmè ne: “Ndi ne cikèènà-kumòna ckwàbò,” ne mêmè kumulondela cikèènà-kumòna aci. Mêmè ne: “Mpindyewu, kùvwà bânà bakesè biikàle naanyi. Tuvwa mu lwendu lwà bulembi. Bàvwà bantu bàà bìpi. Nènku umwe wa kùdìbo ùvwà muvwàle mutèèlù wà màyi a matàmbà, wà tuzùbù-tuzùbù.”

<sup>142</sup> Ki yèyè ne: “Èè,” mwàkambàye, “Mwanèètù Branham,” yèyè ne, “mêmè ncyèna ne mutèèlù wà màyi a matàmbà, wà tuzùbù-tuzùbù to.” Mwanèndè wa balùme, Blaine, wa bidimu dikùmi ne mwandamukùlù, kwambayè mùvwàye kàyi ne mutèèlù wà màyi a matàmbà wà tuzùbù-tuzùbù.

<sup>143</sup> Eddie Byscal, mukwàbò muntu wa mukèsè mwìpì menemene, wa bujitu bwà bwìpacila kilò makùmi àtaanu, kwambayè ne: “Nànsha mêmè ncyèna naawù to, Mwanèètù Branham.”

Mêmè ne: “Èè,” mûngààkambà, “mpindyewu, nyama awu . . .”

Yèyè ne: “Ùvwa nnyama wa mùshindù kaayi mwinè awu?”

Mêmè ne: “Ùvwa ne mmwènekeli wa kashà.”

144 Yèyè ne: “Kakwènaku kashà muneemu to. Ewu mwaba mmutumbùke bikolè.” Yèyè ne: “Pàmwàpa mbowà’s.”

Mêmè ne: “Mbowà’s ùdi ne nsèngù yà bipaapupaapu.”

Yèyè ne: “Aci ncyà bushùwà.”

Mêmè ne: “Ewu yèyè ùvwa ne nsèngù misongòlòke.”

145 Yèyè ne: “Èè, Mwanèètù Branham,” yèyè ne, “kutùyaaya nku citùpà cyà buloba cyà mìkòòkò, kí ncyà tushà anyi cintu cyà mùshindù awu to.”

146 Mêmè ne: “Èè, pàmwàpa ndwendu lukwàbò’s. Mwanèètù Arganbright. . . Cìvwa cìfwànyine kwikala mmu Alaska mu mwaba kampànda,” mêmè ne, “bwalu ùvwa ng’ours munène wa katankù, wa lwonji wa mufiikùlùke.”

Yèyè ne: “Ùvwa ng’ours wa lwonji wa mufiikùlùke wa mùshindù kaayi awu?”

Mêmè ne: “Wa cisengàsengà.” Awu ki udi mutàmbe kumanyika wa ku yòyi yònsò ayi.

147 Yèyè ne: “Mêmè’s ntu mulombodi. Nkààdi mufikèfike mu meetu aa kacya bàndela. Kacya ncitukù mwanji kumòna ours wa cisengàsengà to.” Yèyè ne: “Nkààdi mumòne wa mufiikùlùke wa pa ciibidilu ewu. Kàdi,” yèyè ne, “ncitukù mwanji kumòna wa cisengàsengà to, ncitukù mwanji kumòna wa nàнку to kacya bàndela.”

148 Mêmè ne: “Èè, ùdikù’s, mu mwaba kampànda, ne mêmè nèmmupetè.”

Yèyè ne: “Nèngàmbè ne mbulelèlè.” Yèyè ne: “Nèngàmbè nàнку.”

149 Twètù kwasa lwèndu, paanyimà pàà matùkù àsàtù. Twètù kwasa citùùdilu, ku ndekeelu kwà diitu lwà kùdi micì mikùna yishùkila aku.

150 Nèнку Nzambì ànkwaçishèku, yòyi mishààle mùshindù wàwa too ne ku Bukalenge bwà bidimu cinunu, mêmè nsòmbelekù mwómò amu mu Bukalenge bwà bidimu cinunu. Mêmè ntu ànu munangè kubwela mu bufùki abu kuntwaku. Kaa! Muntu yèyè kàyi mufwànyine kumòna Nzambi muntwamu to, ùdi—ùdi mpofo, mpudimaci, ne kamàmà. Ànu kuMumòna ùDileeja mu mikùnà minènè yà katankù yàya! Kaa, ekèlekèle! Ndòndò ùdi ùbùkila ndòndò, díbà adi, ne muntwamu mwikàle ànu upicila mu cikondo cyà butùmbi.

151 Kì twètù kubànda pa mukùnà kampànda. Bikèngela ànu bwà wèwè kwenda mululàme, mùshindù ewu, ànu bwà

kuwùbànda cyanàànà. Kaa, kamùyi diitu dyà micì mikùna to, ànu tuumicì twà mu cisènsè twenzè cyàtà twà mbowà ki cyònsò cyùdì umòna. Twètù kumòna mikòòkò bu makùmi àsàtù anyi ànaayi nànkù. Kakùvwakù nànsha wùmwe wà bunène bukùmbàne wà kwangata to. Yìvwa ànu yà mivùngàmàne yà cyàbìbìdì cimwè, ne mivùngàmàne yà cyàbìnaayi cimwè. Mvwa—mvwa muswè wà bunène bukùmbàne wa kupàtukakù naawù muntwamu, pa kwalukila mu ntàntà bule abu. Pa nànkù twètù. . . Mémè kwalukila kwìnshì aku.

<sup>152</sup> Ki ditùkù dyàkalondà twètù kubanga kusabuka, kàdi Eddie kudishindayè mu màyi pàkaavwàye ne àtupikè, muvwàle bisàbaatà binène.

<sup>153</sup> Pàvwàye ùbàndila ku luseke lwà mukùnà, Bud kwimana e kwambayè ne: “Enzà ngànji kwangatakù tulòndò twèbè atu, Billy.” Mémè kumupèèsha tulòndò.

<sup>154</sup> Tuvwa twenda ndambù, twakula bwà Mukalenge, ne twela mbilà, ne tuya lubilu tubànda tupweka ku luseke lwà kakùnà aku, tupìcila ànu mu cikondo cyà butùmbi. Mbìmpè bwà kuya, mu lwendu lwà bulembi, wèwè uya ne bānà bèètù.

<sup>155</sup> Ki kwangatayè tulòndò twànyì atu. Kwambayè ne: “Mwanèètù Branham, s’ki cimpàngà cyèbè cyà mùkòòkò cyàcya. Ki yòyi yàya mitwè ku mwandamukùlù miikàle mu ntàntà wa kilòmèètà yipacila ku citèèmà, mwaba awu mene pa lusongo lwà mukùnà mukwàbò lwālwa. Tàngilà nyòyi yàya. Udi muyimòne pāmwe anyi?”

Mémè kwangata. Mémè ne: “Nèngāmbè ne, s’ki yòyi yàya mwaba wàwa, menemene.”

<sup>156</sup> Yèyè ne: “Èè, s’mbipicìibwe ne twètù baalùkile kwìnshì eku, kwasa lwendu mu dindà pabwìpì ne díbà isàtù wa bufùkù’s.” Yèyè ne: “Bìvwa bikèngela twètù kwikala kuulu kwàka patwàmbà kufika pa díbà citèèmà, anyi kuumukila pa díbà dikùmi. Bimpàngà byà bikolè nebùikalè bilàādile panshì. Ki ciikalà díbà menemene.”

Mémè ne: “Mbintu bikwàbò kaayi bìdi byènda binyungulukila kwàka byàbya?”

<sup>157</sup> Mémè ne: “Ki mbowà nyèyè awu.” Mémè ne. . . Nènku, mu ntàntà wa kilòmèètà citèèmà, nudi bamanyè’s, mbikolè bwà kumanya cìdiyì’s.

<sup>158</sup> Ne pashìishe, kuumukila piinè apu, mu ntàntà wa kilòmèètà nkāmà citèèmà ne makùmi àsambòmbò, mùshindù wùdi cikòlòlò cìbùuka awu, kakwèna nànsha mupwa anyi kajila to. Ne paùdì ukafika ku Côte Ouest, udi uya ntàntà wa kilòmèètà mitwè ku cinunu ne nkāmà yìbìdì ne makùmi mwandamukùlù too ne ku Vancouver, kakwèna nànsha kaaba kakesè kàdi bantu bàsanganyiibwa to. Kàdi bantu bàdi bālonà, bàya mu *nùnkù* ewu, ng’Anchorage, mu ntàntà wa kilòmèètà mitwè ku cinunu



ne lukàmà ne makùmi àbìdì anyì cinunu ne nkàmà yìbìdì ne makùmi mwandamukùlù. Walukila mu *nùnkù*, udi ubwela mu kaacimenga kakesè, Yellowknife, mùdì upeta màzuwà a màyi musangu wùmwè ku cidimu bwà ba-Esquimos. Nènku, pashìishe, ufika mu Russie. Pa nànkù, udi menemene ànu nkààyeebè. Apu mpàdì Nzambì mwà kwangacila diikisha Dyèndè, kuulu aku, kule ne ntàtù yètù yònsò ne mateeta mutùdì tuMutèèka amu. Pa nànkù mèmè ntu munangè kubàndakù ne kwakula Nendè pàdìYe mwikishe apu, nudi numòna's, ki dìbà adi ànu mùvwàbì makèlèlèlè dilòlò mu—mu màzuwà a màyi awu.

<sup>159</sup> Nènku patwàlùkìdì kwinshì aku, ki pààkacyàbu mu dindà twètù kwasa lwendu pa bwebwebwe. Lwà pa dìbà mwandamukùlù, tukààvwa bapìcìle mu tuumicì twà musànya ne bikwàbò byònsò, too ne mutwàlu kufika ku lusongo lwà kakùnà aku. Nènku mu njila wa dibànda awu, ki mbowà mukolè uyaàya ewu, mpànga wa bunène ne bule bwìmpè. Kuyayè, kubàndayè kakùnà aku, mwikàle ne nsèngù yà bipaapupaapu. Ki mèmè kwamba ne: “Èè, ne pa nànkù ki mbowà wa kumpàlà ùnkaadìku pàànyì mumòne kacya mu diitu nyèyè wàwa, wa cisuku. Ncìtukù mwanjì kufika mu mwaba mutùmbùke nùnkù kacya kwònsò eku to.”

Yèyè ne: “Èyo. Ki mbowà nyèyè awu.”

<sup>160</sup> Ki twètù kutùngunuka ne kubànda kakùnà aku ne twètù kutàngila. Mikòòkò kayìvwamù to. Ki mèmè ne Bud kutwà eku ne eku. Ki Eddie kubanga wàbwela apa wàbwela apa, ne Blaine, mwanèndè wa balùme awu, bènda bàkènzakana bàkèba nyama yà dyasa.

<sup>161</sup> Ki twètù kuseemena lwà apa, nènku, kaa, ekèlekèle, mèmè kwela ànu lubila lukolè ne: “Butùmbì kùdì Nzambì's wè!” Mèmè kutàngila kwinshì aku, kùvwa mikùnà yà minènè yà nsongo mibwikila kùdì nêjè ayi, bisoosà byà mbowà byà kàlaabi mwinshì mwà nêjè amu. Ne kwinshì kwà byòbì abi kùvwa kùlwa micì yitù ànu ne mabèjì mabishì ayi, civwa nkaadiitu kàà tubèjì tusongòlòke twà tuyèkè. Ki twètù kufika kwinshì kule ndambù, kùvwa kiitwitu kàà tushà twà mpànga, kakùnze. Kumpàla aku ndambù, kùvwa trembles, yà kàlaabi. Byònsò abi biikàle biidìleejila mu dijiba lwà kwinshì kwàbì aku. Kaa, ekèlekèle!

<sup>162</sup> Mèmè ne Bud twètù kwelangana ànu mabòkò kunshìngù, ne kujà ànu ndambù maja a ditùpika twenda tunyùngulukila mwaba awu, tutuuta ànu mikòbolo ne twela mbila, ne tutùmbisha Nzambì. Ki twètù kusòmbela panshì ne mabòkò meelangana kunshìngù, ne kutùmbisha ànu Nzambì. Nènku twètù kupicila mu cikondo cilenga cyà dikèma, ngeela meeji, munda mwà mèbà matwè ku àbìdì.

163 Ki mêmè kwamba ne: “Ambà tũng, ndi ndikonka cidi cyenzèkèle Eddie?” Tuvwa bamwinyike ne “Dude.” Nènku, twètù kwalukila. Twètù kwasa lwendu kuya luseke lukwàbò lwà kakùnà aku. Mêmè ne: “Kí mmufwànyine kujìmina lwà apa to.”

164 Ki mêmè ne: “To. Blaine ùdi lwà kuntu kwàka mu mwaba kampànda, ne yèyè’s ng’Indien.”

165 Ki twètù kukènzakana, ne mêmè kumòna cyamù cyà mpòngòlòfwatù citèèka mwaba awu. Mêmè ne: “Civwa cyà Eddie.” Mêmè kutàngila kwìnshì kwà kakùnà aku. Ki mêmè kuya mu *nũnku*, ne yèyè kuya mukwàbò mùshindu.

166 Kàdi Eddie ùvwa munkaci mwà kwenza ne: “Sh-sh-sh-sh.” Ùvwa ùjikangana ne mbowà mukesè, wa mpànga awu. Nènku ùvwa muswè kumwaluja kwìnshì aku, kumudiisha kùdì balundà ba-Indiens kùvwaye wènza bumpandanjila aku. Pa nànkù, kwasayè mbowà awu. Twètù kupweka ne kumusukula.

167 Kwalukila, tukààvwa lwà pa díbà ùmwè jaajaaja. Twètù kusangana cyàkàbidì tubalù twètù twà díbànda atu, mu ntàntà wa mètres nkàmà mwandamukùlù, mùvwaatu twimàne amu. Nènku tuvwa biimànepù. Yèyè kwamba ne: “Mwanèètù Branham, utu munangè kwenda lwà makàsà anyi?”

Mêmè ne: “Ntu mucinangè cyà bushùwà.”

168 Yèyè ne: “Twètù babànde mukùnà ewu. . . Bimpàngà byà mìkòòkò abi mbiyiilè *eku*, ne mbipwekè bikabwelè mu ditùbù dikwàbò dyàdya, pàmwàpa. Yòyi kayiyi mikabwelèmu to, mmyalùkidilè njila mukwàbò *ewu*.” Yèyè ne: “Eddie ne bakwàbò abu bàalukilè, ne bàpicilè mu mwaba mukòsa *ewu*, ne bàngatè kàànyì kabalù kàà díbànda ne kèèbè kabalù wèwè kàà díbànda, bàmbule mbowà bàye nendè ku citùdilu. Nènku twètù netùpicilè apa twenda twenda lwà makàsà too ne ku mwaba wàwa. Ne nebìkengèlè bwà twètù kwalukila lwà pa díbà dikùmi anyi dikùmi ne umwe diòlò edi.”

Mêmè ne: “Mbìmpè. Netwènzè nànkù.”

169 Nènku, tuvwa biimàne mwaba awu. Twètù kudyà ànu dikopo dyà misangi, dimwè ku muntu, yònsò wa kutùdì. Ki twètù kujiiika mwìnshì mwà bisoosà abi, misangi eyi. Ne màmpà ètù, tuvwa baèlè mu mitèèlù, kàdi twètù kukòpakana too ne mwàkalwàwu ónsò awu dibùlù dinènè dimwèpelè. Kàdi àvwa mimpè, paùdì ne nzala. Ne àdi bimpè. Pa nànkù, tuvwa biimàne mwaba awu.

170 Kàdi mvwa ànu nkènzakana. Ki mêmè kutàngidila mu tulòndò. Mêmè kwamba ne: “Bud, tàngilà kùneeku. Ncinyi cyàcyà kwàka nàka?”

171 Mu ntàntà wa wipacila kilòmèètà mitwè ku yìtaanu, mbòwà awu nyawù ùvwa mulààle mwaba awu. Ne ùvwa wa pabwèndè. Kacivwa nnsèngù yà bipaapupaapu to; yivwa nyà misongòlòke. Mêmè ne: “Udi muvùlùke anyi? Tàngilà kùneeku.

S’ki mmwènekeli wa pa bule awu wàwa, ànu menemene’s. Ne s’ki nyama udi mulààle panshi wàwa, ànu mùvwàbi.” Mémè ne: “Kùdi cintu ànu cìmwèpelè cìdì cìpangishà cìkèènà-kumòna aci, mmuntu mwikàle ne mutèèlù wà màyi a matàmbà, mutèèlù wà matobàmatobà awu.” Kàdi ki Eddie wàwa mwimàne muvwàle mutèèlù wà màyi a matàmbà, wà matobàmatobà. Mémè ne: “Pàànyi’s mvwa ndyàmbedila ne kùvwà naawù.”

172 Yèyè ne: “Mukàjàànyi ngudi ne cyà kwikala muwèlè mu cibuta. Pàngàdìshìndi mu màyi, makèlèlè awu, ngààlu kushintulula mitèèlu.” Yèyè ne: “Ncivwa mumanyè ne ùvwa muwèlè muntamu to, Mwanèètù Branham. Ùmfwilèku luse bwà mùndi mukwambile cintu cyà kaciyi cyòci.”

Mémè ne: “Bìvwa bikèngela ànu wèwè kwenza nànkù’s, mwanàanyi wa balùme.”

173 Kaa, Bud kubanga kwela mbila. Yèyè ne: “Udi mwà kwimana ànu kaaba aka mene ne kumwasa, mu ntàntà wa kilòmèètà yìtaanu. Kí mmwòmò anyi, Mwanèètù Branham?”

Mémè ne: “Bilondèshile cìkèènà-kumòna aci, mvwa ànu pabwìpì nendè.”

174 Yèyè ne: “Mwanèètù Branham, ndi nkwambila’s, neùkafikè kwìnè kwàka bìshi?”

Mémè ne: “Ncyèna mumanyè to, kàdi nènkufikè.”

Ki yèyè ne: “Neùkufikè bìshi?”

Mémè ne: “Nényungulukè mwaba wònsò wà kacya wàya ewu.”

175 Yèyè ne: “Mmwaba wà diima.” Ki mémè. . . Yèyè ne: “Wèwè musenùnùke, newikalè ne cinunu cijimà cyà tonnes yà nèjè pambidi pèèbè, mu kasùnsukilà kàà kasunsa.”

176 Ki mémè ne: “Mukalenge ngwatàngila bwalu abu. Mùshindù awu ki wùmvwà muyè, mu cìkèènà-kumòna aci, ànu ngenda nyùnguluka.”

Yèyè ne: “Èè, nèngùikalè ngenda nkulonda.” Ki yèyè ulwàlwa ewu.

177 Ki nsongàalùmè eyi kwambayi ne: “Twètù netùshaale apa mpindyewu too ne pawàpetà mbowà awu,” ki bôbò ne, “pashiishe netù—netùpwekè, tuye kangata tubalù kàdi tubwelèmu. Netùkatwilàngànè neebè kwìnshì lwà ku ndekeelu kwà lubùwà, kaa, mu ntàntà wa wìpacila kilòmèètà yìsambòmbò anyi mwandamukùlù kwìnshì aku.”

Yèyè ne: “Èyo.”

178 Ki twètù kwasa dinyùnguluka, mémè ne Bud. Bu mu citùpà cyà dìbà nànkù, twètù bajikije dinyùnguluka adi. Nènku mbowà awu mulààle panshi apu, mutàngile buludi kutùvwà aku, kàdi kàyikù mutùmòne to. Ùvwa ne cyà kwikala mulààle tulù. Nènku twètù kubàndila mu kaacikòsolwedi kakesè, ne kwalukila, ne

kusemena mu ntàntà wa mètres citèèmà nendè. Ki yêyè awu mulààle panshi mwaba awu. Nyama munène, wa katankù ewu, kujuukayè mwaba awu, pàànyì kumwasa.

<sup>179</sup> Nènkù patùvwà basòmbe mwaba awu, twangata mètre wa dipima nendè, ku yêyè awu, ne bikwàbò, mùshindu awu, Bud kwambayè ne: “Uvwà mwambè ne nsèngu eyi yìvwa bule bwà centimètres lukàmà ne mwandamutekète anyi?”

Mémè ne: “Ncyà bushùwà menemene.”

<sup>180</sup> Yêyè ne: “Mwanèètù Branham, yìdi ne cyà kwikala bule bwà centimètres nkàmà yìsàtù ne makùmi àsambòmbò,” nnyama munène be.

Mémè ne: “To. Yìdi ànu lukàmà ne mwandamutekète bulubulu.”

Yêyè ne: “Mémè ndi ne mètre wa dipima nendè kuntwaku.”

Mémè ne: “Udi ucyèla mpatà anyi?”

Yêyè ne: “To, mukalenge.”

<sup>181</sup> Yêyè ne: “Kàdi, anji indilàbi kakesè, kùvwakù mungambile ne newàsè ours munène wa lwonji mufìkùlùke kumpàlà kwà wèwè kwalukila kwinshì kwàka anyi? Kùvwa mwà kwikala ours wa cisengàsengà, kumpàlà kwà wèwè kwalukila kùvwà nsongàalùmè wàwa, udi muvwàle mutèèlù wà màyì a matàmbà wàwa anyi?”

Mémè ne: “Aci mbulelèlà.”

<sup>182</sup> Kutàngilayè paanyimà kwinshì kwà kakùnà aku. Èè, kakwèna cintu cyà citùmbùke *nàka* to, nànsha cimwè. Ànu bisoosà bípì, ki cyònsò cinùdì numòna, mu kilòmèètà ne kilòmèètà, ànu tukùnàkùnà twà bisoosà bípì twènda tulondangana. Yêyè ne: “Udi penyi mwinè awu’s, Mwanèètù Branham?”

<sup>183</sup> Mémè ne: “Yêyè ùdi mwà kumumpetela. Yêyè ngudi mwambè nànkù.” Mémè ne: “Wèwè udi ucyèla mpatà anyi, Bud?”

Yêyè ne: “To, mukalenge.”

<sup>184</sup> Èè, mu kupweka kwà kakùnà, tuvwa twènda tulwa mùshindu *ewu*. Yêyè ùvwa wàmbula cingoma katanci, ne mémè mwambùle nyama awu, twenza kushintakaja. Bìvwa ànu bikèngela bwà twènda basendàme, mu dipweka amu, nsèngù minène ayi yènda ànu yilaaba mu bisoosà amu. Ki twètù kufika mu ntàntà bu wa kilòmèètà umwè ne citùpà nànkù awu. Twètù kwimana ne kukènzakana. Yêyè ne: “Bikèngela ours mukolè awu àmwènekèku’s, kí mmwòmò anyi?”

Mémè ne: “Ncinyi cyùdì—cyùdì uditàcishila’s?”

Yêyè ne: “Nànsha cimwè.”

<sup>185</sup> Twètù kutùngunuka too ne patwàkafikà pa kaadibwe kampàndà kàà mashika kapìcile mu njila. Twètù kusòmbapù

ne kwanji kupetakù ndambù wa citaleela. Yèyè ne: “Mwanèètù Branham, anji elàbi meeji pa bwalu abu,” yèyè ne, “katwèna bapite, kaa, nànsha cyàbìbìdì cìmwè cyà kilòmèètà to bwà twètù kufika pàdì nsongàalùmè ayi, ne mwaba kampànda pankacì pàà kaaba aka ne kwòkù aku neùshebeyè ours wa cisengàsengà awu.”

<sup>186</sup> Mémè ne: “Ncyà bushùwà. Ncyà bushùwà.” Yèyè ne . . . Mémè ne: “Wèwè udi wela bwalu abu mpatà, Bud.”

<sup>187</sup> Kujuukilayè kuulu e kunkwàtayè ku cyanza. Yèyè ne: “Mwanèètù Branham, mwanèètù wa balùme awu kí mmupalùkekù musangu nànsha wùmwè to kacya ànu ku ditùkù adi too ne leelù.” Yèyè ne: “Nzambì mwinè uvwa mwà kukwambila bwà mwanèètù wa balùme awu, kí mmufwànyine kukushima to.”

Mémè ne: “Bud, nyama awu’s neikalèku.”

Yèyè ne: “Neàfuminè penyì?”

<sup>188</sup> Mémè ne: “Ncyèna mumanyè to, kàdi,” mémè ne, “Bud, ndi ne bidimu makùmi àtaanu ne bìbìdì,” (musangu awu’s), ki mémè ne: “nkàadi mumòne bikèènà-kumòna, kacya ànu ku bwànà. Kàdi pàngàmònu mbowà ewu kaaba aka, mumushebèye, kàdi ùmonè nsèngù ayi ní kayèèna bule bwà centimètres lukàmà ne mwandamutekete. Ne pashìishe, cìkèènà-kumòna cìmwècìmwè aci, mémè mu njila wa dyalukila mutàngile kùvwà beena dyànyì, bàmvwà naabò abu, mémè kushebeya ours wa lwonji, wa cisengàsengà ewu.”

Yèyè ne: “Mwanèètù Branham, s’ndi mwà kumòna too ne mu ntàntà wa kilòmèètà makùmi àsàtù ne yìbìdì.”

<sup>189</sup> Yèyè ne: “Nebìkengelè bwà Nzambì àmupàtwile mu buloba’s, anyi àmutùulwile mu maulu, anyi cintu kampànda.”

Mémè ne: “Kuditàcishi to. Nyama awu neikalèku.”

<sup>190</sup> Twètù kwenda kàbìdì ntàntà mukwàbò wa mètres makùmi citèèmà. Ùkaavwa pèndè ànu bu muzengèle’s. Ewu ùvwà ne bujitu bwà kilò mítwè ku makùmi àsambòmbò ne mwandamukùlù, utùkaavwà baasè ewu. Pa nànkù, mu kupweka kwà kakùnà aku, ki yèyè–yèyè kumutèèka panshì. Kwambayè ne: “Yoyòyò! Nkàadi mupùngile ngamba kufwà.”

<sup>191</sup> Mémè ne: “Èyowà.” Twètù kubwela mu kaadiitu kàà tubèjì tusongòlòke kàà tuyèkè, diitu dyà tuyèkè dîbà adi, twìpacila butùmbùke *ebu*. Mùvwà nyuunyì yà nkwadì milùme yìbùùka eku ne eku, ne mùvwà nkwadì mikàji, nènku mémè kuyàasa mabwe mùshindù ewu.

Ki kwambayè ne: “Ukàadikù mudyè yìmwè yà ku nkwadì mikàji ayi anyì?”

Mémè ne: “Bwàlà. Ncyèna ngeela meeji ne nkàadikù muyidyè to.”

192 Yèyè ne: “Mmîmpè be. Mmîmpè ànu mùdì nyuunyì yà nkwadi milùme amu.” Yèyè ne: “Mwanèètù Branham?” Kuumushayè cifulu cyèndè cinènè cifikè cyà kale aci, kudyèlayè kapeepà. Yèyè ne: “Dìbà dikaadi dikùmbàne bwà ours awu àmwènèkè, kî mmwòmò anyì, mulùmýànà?”

Ki mèmè kwamba—mèmè kwamba ne: “Bud, wèwè udi ucyèla mpatà.”

193 Yèyè ne: “Bwǎlà. Kí nnàнку to. Kàdi, Mwanèètù Branham, ncyèna—ncyèna—ncyèna ànu mwà kuumvwa to.”

194 Mèmè ne: “Nànsha mèmè pàanyì. Bwànyì bwalu kî mbwà kuumvwa to. Bwalu bwànyì mbwà kwitabuuja.” Amen. Nzambì mu Dyulu mmumanyè ne bintu ebi mbilèlèlè. Ndikù mufwànyìne kwimana mwaba ewu kwamba cyôci eci, bu kaciyi cilelèlè anyì?

195 Pashìshe mèmè kubanga kukùdimuka, bwà kumupèèsha cingoma, ne mèmè kwambula nyama awu. Kàdi pâmvwà nkùdimuka apu, mèmè kwamba ne: “Bud, s’udi ne tulòndò atu munshingù. Ncinyì cidi ciimàne ku luseke lwà kakùna cyàcya?”

196 Ki kujuulayè tulòndò atu. Yèyè ne: “Kaa, ndi ngambilamu’s,” yèyè ne, “àpu ní nngombe wa mabèèle wa muntu kampànda!” Kakùtu cintu bu nàнку mu citùpà cyà buloba aci to. Yèyè ne: “Wàwa’s ng’ours wa lwonji wa mutàmbe bunène wùntù nciyikù mwanjì kumòna kacya bándela. Kàdi ndi ngambilamu’s, tàngilà dìbà dyà kàlaabi didì dikenkeshà pambidi pèndè dyàdya. S’ng’ours wa cisengàsenga.” Yèyè ne: “Udi wèwè wamba ne udi mu ntàntà wa bule kaayi?”

197 Mèmè ne: “Udi mu ntàntà wa kilòmèètà mitwè ku yìsàtù ne ndambù kuulu kwàka.” Kàdi tukààvwa bu bazengèlè’s. Yèyè ne. . . Mèmè ne: “Citùdì bindilè ncinyì? Twàyi.”

Ki yèyè ne: “Udi mutwishìibwe ne neùmwasè anyì?”

Mèmè ne: “S’ncyà bushùwà ne nèmwwasè.”

Yèyè ne: “Ncingoma kaayi cyùdì ukwata naaci mudimu aci?”

198 Mèmè ne: “Mpindyewu, kùtácishi meeji bwà aci to.” (Kàvwa nkaacingoma kakesè kàvwà mwanèètù kampànda mumpèèshe mu disangisha musangu kampànda, kùkaavwa bidimu byàbùngì.) Ki mèmè ne. . . (Kaacingoma kakesè, kàà mushinga mupuutula kàà .270.) Ki mèmè ne: “Eyo. Ndi ne. . . ndi. . . Necyènèkè.”

199 Twètù kutùngunuka ne kutàmba kusemena. Patùvwà tutàmba kusemena, nyama awu pèndè ùmwèka mutàmbe bunène yèyè mwinè. Kaa, ùvwa ùmwèka bu mushiki munène wa bisoosà byà kudiisha nyama muungwijila pamutù pa bisoosà bípì abi, nudi bamanyè’s. Cintu ciimàne, cinène, cyà menemene, cyà katankù, mutù wàmba kwipacila bunène *ebu*, nudi bamanyè’s, ne mbàngà myalàbàle, ne makamà manène a menemene. Ne ùvwa ùtùla tuumatàmba tukèsè twà mbèèlèbeele etu, mùshindù *ewu*, nudi bamanyè’s, mwikàle ùtùdya. Nènku musòmbe, mulùmýànà

munène menemene! Twètù kufika, kaa, mu ntàntà wa wìpacila mètres makùmi mwandamutekète nendè.

200 Yèyè ne: “É, Mwanèètù Branham, kacya ukààdikù—ukààdikù mwasè ours wa lwonji mufìkùlùke kwònsò eku anyi?”

201 Mémè ne: “Nkààdi mwasààse ours yàbùngì, Bud, kàdi kacya ncítukù mwanjì kwasa ours wa lwonji wa cisengàsengà kwònsò aku to.”

202 Yèyè ne: “Udi mumanyè’s, ours wa cisengàsengà awu ngutu mutàmbe kwikala mulwishanganyi munène ku yôyi yònsò.”

Mémè ne: “Èyowà, ngǔmvù aci.”

Yèyè ne: “Yèyè kàtu mumanyè ne kufwà kùtu bìshi to.”

Ki mémè ne: “É?”

203 Yèyè ne: “Kwikadi . . . Mmu ntàntà bule kaayi—kaayi—kaayi mùdi . . . ? Bìdi bikèngela bwà wèwè kuseemena nendè mu ntàntà bule kaayi ne cyòci aci?”

204 Mpindyewu, mukonkàayi ànu yèyè awu. Mufùndilaayi mukàndà. Mémè nénkwambilè mwaba wùdiye. Yèyè ne: “Muntu kanà yònsò ewu àmfùndilè mukàndà pa bwalu abu, udi muswè awu, pa cyònsò cyà ku bintu abi. Mémè mmwambilè.” Nènkù ki . . .

Ki mémè ne: “É?” Mémè ne . . .

Yèyè ne: “Mpindyewu anyi?”

205 Mémè ne: “To, to. Mémè mvwa museemène mu ntàntà mwìpì kùdi ewu, Bud. mvwa ànu pabwìpì, pabwìpì nendè.”

206 Yèyè ne: “Tukàadi tutàmba kuseemena pabwìpì mpindyewu. Yèyè’s ùdi mwà kuvuma dîbà kanà dyònsò.”

207 Mémè ne: “Aci ndi mumanyè. Kàdi,” mungààkambà, “Bud,” mémè ne, “s’nebìikalè ànu bìmpè.”

208 Yèyè ne: “Mpindyewu, paùdi wasa ours,” yèyè ne, “mpindyewu, Mwanèètù Branham, s’udi umwashila lwà paanyimà’s. Bikèngela ùmucibwilè panshì, bwalu yèyè neàtungunukè ne kulwangana, kàyi mwà kujuukila kuulu dîbà adi to.”

Mémè ne: “To, bilondèshile cikèènà-kumòna aci, ngàkamwashila mu mwoyi.”

Yèyè ne: “Ndi ntèkemena ne kwèna mutùpàkànekù pa bwalu abu to.”

209 Mémè ne—mémè ne: “To.” Mémè ne: “Ndi muvùlùke bwalu abu.” Bwalu, mu—mu cikèènà-kumòna, wèwè udi mu—udi mu cyumvwilu cimwèpelè, ne byònsò bìbìdì, mutùvwà bacyùmvwije dilòlò adi amu. Wèwè udi mu bìbìdì. Kwèna mwà kucipwakù mwoyi to. Nwamònu anyi? Pa nànkù’s ki bwalu mbwòbù abu.

210 Ki twètù kuseemena cyàkàbìdì, mu ntàntà wa wìpacila—wa wìpacila mètres nkàmà yìbìdì ne makùmi àsàtù. Ànu aci ki civwà

mupwa mukese wa ndekeelu wutwàkasambukà. Ki mémè ne: “Eci ki ntàntà mpindyewu. Mutàngilèbi. Ki mmulenga anyi?”

Yèyè ne: “Èyo, ndi ngeela meeji ne mmùdiye.”

<sup>211</sup> Ki—ki mémè ne: “Èyo, Bud. Mpindyewu pàngàajuukà kaaba aka, yèyè ùdi ùlwa.” Ki mémè ne: “Utàngilè wèwè ànu cyanààna.”

Ki yèyè ne: “Nèngiikalè mutàngile.”

<sup>212</sup> Pa nàнку mémè kwela dìzajì mu lubungu lwà cingoma amu, nudi bamanyè’s. Nèнку tukaàvwa bapwekè kwinshì kwà mupwa mukese ewu. Ndi mwenzè anu njuuka, ki yèyè ulwàlwa ewu. Ekèlekèle, ekèlekèle! Mémè kwimana, kutuuta cingoma, kàdi kuumvwikaci ànu bu mùdì mulonda mumutuutè’s. Balùmyàna wa yààya, kacyakamunyùkushakù to nànsha kakesè, nànsha kakesè. Nèнку, ekèlekèle, kumpàla kwà. . .

<sup>213</sup> Nwènu bàdi bààkulà bwà lubilù’s! Kacya ncìvwakù mwanjì kumòna cintu nànsha cimwè cyà mùshindù wàwa to. Yèyè, mmufwànyine kupita kabalu, anyi kashà ku lubilu, anyi ni ncinyi, nudi bamanyè’s, ours yèyè udi mwà kubìpita, mùshindù awu. Pendè munkaci mwà kupweka buludì kakùnà aku, mutàngile bùludì kutùdì, mùshindù awu.

<sup>214</sup> Nèнку mémè, kumpàla kwà mémè mufwànyine kwela dikwàbò dizajì mu cingoma, yèyè kudyela panshì mufwè cikàdi, mu ntàntà bu, kaa, bu wa mètres makùmi àbìdì ne mwandamutekète, anyi makùmi àsàtu ne àsambòmbò ne mwaba wùmvwà awu, kwelayè ànu katungu; bimwangàte mwoyi, bisùlùsùlù, ne byònsò, munda. Divwa ndizajì dyà Nosler, munùtù nwènu beedi bàà màzajì mu bingoma ne byanza bamanyè amu. Ki dyòdì—dyòdì kumusùsuladì’s, ne kudishìndayè.

<sup>215</sup> Bud, mwimàne mwaba awu, kukenketayè, ku mishikù kumutòòkolokakù kwònsò. Yèyè ne: “Mwanèètù Branham, ncìvwa mumuswè pambidi pàànyì to.”

Mémè ne: “Nànsha mémè pàànyì.”

<sup>216</sup> Yèyè ne: “Yoyòyò.” Yèyè ne: “Ndi muswè nkwanbilè, paanyimà pàà bwalu bumàne kujika, mulùmyàna. Bu ne kacìvwa cimwè cyà ku bikèèna—kumòna abi to, ne bínkaavwà mumòne byenzèke kumpàla abi, nùнку ncyènaку mulwè kaaba aka, pabwìpì ne ours awu, pàmwè neebè to.”

<sup>217</sup> Nèнку nànsha umwe wa kutùdì kàvwakù mwà kumunyungisha to. Ùvwa ne bujitu bwà kilò yìpacila ku nkàmà yìnaayi ne makùmi àtaanu, ngeela meeji, pa nàнку, mulùmyàna wa katankù, munène. Katùvwa ne mùshindù wà kumusukula to, tuvwa ne. . . kumuuvula cisèba. Twètù kubanga kupweka. Ki twètù kwamba. . . “Mwanèètù Branham?” Twètù kwangata nsèngu ayi. Yèyè ne: “Nsèngu ayi yòyì ànu menemene bule bwà centimètres lukàmà ne mwandamutekète,” yèyè ne, “s’nyèyeemè ànu bu mupàle.”



218 Mémè ne: “Nànkù, bikèngela ùbangè mpindyewu mene, bwalu ki bule bùdiyi.”

219 Yèyè ne: “Kacya ncitukù mwanji kumòna ci—ci—ci. . .Bìdi bìmwèka bu ne ndi munkaci mwà kulòòta cyòci eci’s.”

220 Nènkù patwàpwekì kwinshì aku, ne mémè kwa—kwambila Eddie, ngamba ne: “Mpindyewu tàngilà. Blaine neàteekè byanza byèndè.”

221 Mpindyewu, nudi bavùlùke ne, kùvwa kaacyanza kakesè kanyùngùlùkile lusèngù alu. Udi muvùlùke anyì, Mwanèètù Fred, múmvwà munwàmbìle ne nekiikalèku?

Ki mémè ne: “Citàngìlè,” ngambila Eddie.

Nènkù ki Bud ne: “Indìlaayi.” Yèyè kuya katèèka kabalù kèndè kwàka.

222 Ne tuvwa bambùle ours awu pambidi, nudi bamanyè’s, ne tubalù atu twikàle ànu tusùnsulula bintu byònsò. Nudi bamanyè mùtùtu twènzà padìtu tùmuvwa mupùuyà wà ours mufiikùlùke anyì ours wa mùshindù kanà wònsò amu. Ki mémè—mémè kuya kuntwaku, kukwàta, nteeta bwà kukwàta kabalù aku, cisòmbedi cyà pa kabalù cyàmba kutùuka.

223 Ki kuya kangatayè mètre wèndè wa dipima nèndè awu, ne kulwayè wènda ùkòsolwela mwaba awu, muntàngìle, mùshindù ewu. Yèyè ne: “Lwàku apa, Blaine.” Mémè kutuuta Eddie cintu. Kuàtèekayè pa cyòci eci. Amen. Kàdi ndi ngambilamù’s, centimètres lukàmà ne mwandamutekète, bulubulu!

224 Mpindyewu, nsèngu ayi yìtu yìfwatalala yìjimija bule bwà centimètres mitwè ku yìtaanu pàdiyi yùma. Ours wa lwonji mufiikùlùke awu ùdi ùsanganyiibwa mu cibambalu cyànyì cyà ciikishilu, ne nsèngu ayi mmikùdika ku cimanu. Muumishi wa bisèbà ùvwa mubìlongòlòle, ne mubyàkàje. Kùdi mètre wa dipima nèndè mulembelejapù, ànu centimètres lukàmà ne mwandamutekète, menemene.

225 Mpindyewu, ncinyì civwà Nzambì mufwànyine kwambidila muntu cintu cyà mùshindù awu, bwà lwendu lwà bulembi?

226 Pàngààkaalukilà, mààmù ùvwa ùsaama. Mémè kuya bwà kamumòna. Yèyè ne: “Billy?” Nwamònu’s, Ùvwa uùnkolesha ku mwoyi, ùndogolola ku cintu kampànda.

Mémè ne: “Maman, Mukalenge’s ùkaadi misangu yònsò ànu mukwondòpòndòpe.”

Yèyè ne: “Billy, nkààdi ngaalukila Kumbèlu bwà kuya kamòna papa.”

“Kaa,” mûngààkambà, “maman, kwàkulu mùshindù awu to.”

Yèyè ne: “Èyowà’s, eku ngamba.” Mémè kumusambidila.

Ne Mwanèètù Fred ne bantèmù bònsò bàdi basòmbe apa aba mbamanyè.

227 Pashiishe, katanci aka, kuyabò nendè mu lùpitaadi. Ngàngàbukà kàvwa nànsha mumanyè ne lutàtù lùvwa cinyi to. Èè, mèmè kuya bwà kamusambidila. Yèyè ne: “Mwanàanyi, nnkàadi nya.” Nènku mpindyewu, mààmù mu mùshindù kampàndà ùvwa mukàjì wa bukolè’s, twamb’eku twamb’eku.

228 Dìngà ditùkù, ndambù wa matùkù paanyimà pàà cyòci aci, mèmè kubwela. Ùvwa mwimàne mwaba awu, mutàngile buludì muulu mu Maulu. Kwambayè ne: “Billy, ndi mukumòne.”

Mèmè ne: “Mòna’s, bushùwà’s, maman.” Yèyè ne: “S’nyewù nkumòna ànu mwab’ewu mene.”

229 Yèyè ne: “Kaa, udi mukùlakàjì be, Billy,” yèyè ne, “mvyà yèbè ne myedi mbilembèlèlè ànu pàmwè’s. Udi ne dibòko dijìngila ku nkùrusè, wòlola cianza bwà kumpeta mèmè.” Mèmè kupeta cingènyingenyi cìmpè dībà adi, cìvwa ncyòci.

Mpindyewu, nwènù bânà bèètù kaaba aka nudi bamanyè ne aci mbulelèlè.

230 Ditùkù dyàkalondà òvwa mmu dyàlumingu. Mvwa munkaci mvà kuyiisha. Kuntùminabò mukenji ne: “Webè. . .”

Mèmè ne: “Ncyèna ngiitabuuja ne mààmù ùkaadi ùya to. Nzambì ùtu misangu yònsò ànu ùndeeja, beena fàmiyè wanyi pa kuyabò. Kàdi, bwà mààmù, Yèyè kì mmundeejèku kantu nànsha kàmwè pa bwalu abu to.” Kì mukenji wùlwalwà ewu. Byà bwalu mvwa ànu munkaci mvà Diyiisha dyànyi, mùshindù ewu. Muntu kubwelayè, wàmba ne: “Ndà, ndà kùdi mamwèbè ànu mpindyewu ewu. Mubiikilè ku tèlefonè. Ùkaadi ùpùnga ne lufù, mu kasunsa emu.”

231 Mèmè ne: “Lufù, mulekèlè mu ditalala. Dìyì dyà Nzambì didi ne mushinga kutàmba aci.”

232 Muntu udi musòmbe kaaba aka mene ewu, Mwanèètù Borders. Paanyimà pàà disangisha dimanè kujika, mèmè kuya bwà kamòna mààmù. Mèmè kusambakeena ne Mwanèètù Borders. Kwambayè ne: “Mwanèètù Bramham, wèwè kwènà menemene bule bwà mètres àbìdì to, kàdi ndi mumòne muntu wa mètres àsàtù mwimàne mu cyambilu mu dindà emu.”

Mèmè ne: “Mwanèètù Borders, Nzambì neàtangilè byònsò abi bwà maman.”

233 Kì ndambù wa matùkù paanyimà pàà cyòci aci, kumbiikidishabò mu cibambalu amu, ne yèyè ùkaavwa ùya cyà bushùwà. Mèmè kukùngwija bânà, banyùngùlùkile bulààlù. Mèmè kwamba ne: “Maman, ncyà bushùwà ne ukàadi uya anyi?”

Yèyè ne: “Èyowà.” Pashiishe kàcìvwa kàbìdì mvà kwakula to.

234 Mèmè kutùngunuka ne kumwambila ne: “Yesù ùdikù ne mushinga kaayi bwèbè wèwè, mààmù?” Ndi mvùluka mùngàakamubàtiizà mu Dinà Dyèndè, kùkaadi ntàntà mule, mu

mâyi. Mêmè ne: “Ngambilèku mushinga wùdìYe bwèbè wèwè mpindyewu.”

Yèyè ne: “Mutàmbe ne mwoyi bwànyì mêmè.”

235 Mêmè ne: “Maman, pìikalàbi ne ukàadi uya, mêmè ewu’s ndi mwanèèbè, ne. . .muyiishi. Ndi muswèku kumanya, mmanyina kùdì mààwù wanyì mundedi ukàadi uya katwilangana ne Nzambì awu. Ndi muswèku bwà nkukwàtè ku cyanza kaaba aka, maman.”

Yèyè ne: “Ndi muswè bwà wènzèku nànkù.” Mêmè kushààla ànu kacya ngaacìkwàta.

236 Kàvwa mwà kwakula to. Bivwa ànu bu ne ùvwa wenda ukwàcika tukùlákàji, kwìsù aku. Mêmè ne: “Kùcyenà mwà kwakula kabidì anyì, maman?” Kàvwa mwà kwenza. . .Mêmè ne: “Tèèlejà. Yesù ùcìdì ànu umwèumwè awu bwèbè wèwè anyì?” Ùvwa mwà kushikula mutù.

237 Pashìishe kufikayè mu mùshindù wà kaciyi mwà kushikula kàbidì mutù to. Mêmè ne: “Mààwù, Yesù ùdì byònsò bwèbè wèwè mpindyewu anyì? Yèyè ùlwalwa kukwangata, mu katanci emu. Byònsò, bwèbè wèwè anyì?” Kàcìvwa mwà kunyunga to.

238 Mêmè ne: “Maman, udi ne cintu ànu cìmwèpelè, udi. . . Nyawù mmòna upòdya. Pìikalàbi ne Yesù ùcìdì ànu ne mushinga wùmwèwùmwè awu bwèbè wèwè mùvwàYe kwònsò eku amu, ditùkù dngàakakubàtiizà mu mâyi adi, pòdyakù lùkàsàlùkàsà.” Kupòdyayè, ne binsònji bipweka, mùshindù ewu.

239 Ki Kacipeepèlè kakesè kulwakù, kàtuuta eku ne eku mu cibambalu amu. Ki Mààwù udi walukila Kumbèlù wàwa.

240 Mêmè kwalukila kumbèlu, kupàtuka kuya ku nzùbu wa bitàlù, kusungula bilàmbà. Kaa, s’nudi bamanyè mutùbi amu. Byàkakèngelakù bwà nwènù kwenza cintu cìmwècìmwè aci. Bânà bònsò mu myadi, ewu pa mwaba, ne ewu, mukwàbò mwaba. Mêmè ne: “Maman nguvwa mùlembà wà ciikishilu. Katwàkwikalakù kàbidì mutùvwà amu to.” Doc ne dyèndè dîkù mu *edi* ditumba. Jesse ne dyèndè dîkù mu *dyàdya* ditumba. Tuvwa tufùma ku dijiika Howard, kakùyì kwanji kwenza ntàntà to. Mêmè kwamba ne: “Èè, bwètù bwàtùuku, balùmyànà wa yààya.” Mêmè ne: “Netwikalè. . .Katwàkulwa bwà kumòngana muntu ne mukwèndè to. Maman nguvwa ciikishilu cyètù.” Mêmè ne: “Katwàkutàmbe kumònganganakù kabidì muntu ne mukwèndè to, bwà mpindyewu.”

241 Mêmè kwalukila kumbèlu, mèbà a bufùku awu, paanyimà pàa twètù bamanè kumusungwila bilàmbà. Mêmè kwalukila kwànyì kumbèlu.

242 Màmàmù D’Amico, kùdikù muntu mumumanyè anyì, wa ku Chicago awu? Ùvwa mulundà munanga be wa kàmpanyè. Ùvwakù mumpèeshe Bible. (Mfwilaayikù luse.) Ne ùvwa umwe wa ku Bibles yà màleetà mafùnda ne mâyi makünze ne mwela

tirette awu. Ki muntu kampànda, pàngaàkayiishà diyiisha adi ne, *Mwànà Wa Mùkòòkò Nè Nyuunyi Wa Nkuci* adi apu, ùvwa muntùmìne nyuunyi yà nkuci yìbìdì, bu bikwàcìlu. Mukwàbò mwanèètù wa balùme, Mwanèètù Norman, ùvwa muntùmìne kanyuunyi kakesè kàà nkuci, ne kànà kàà mùkòòkò, Mwanèètù Borders kumpèeshayè kànà kàà mùkòòkò. Mémè kwambula Bible awu. Meda ùvwa mu ditumba, mufwàngàne ne mwadi.

243 Ne nwènù bònsò Beena Kantu-ku-byanza aba's nudi bamanyè ne, pàmvwà nsanganyiibwa mu Jamaïque, ngàkamòna màmwènàànyì, munùlondèlè ku mèèsà mu Jamaïque mwàmwa. Mémè ne: “Muntu kampànda wa mu fàmìyè wanyì ùdì ùpùnga ne lufù, udi kàcìyi ne mènù to. Ndi mmumòna ùya.” Ànu ku mèèsà aku mene, Demos Shakarian ne bònsò bàà kùdìbo basòmbe mwaba awu. Nkupìte ànu ndambù wa mēba, màmwènàànyì kudishìndayè e kumbà kufwà, musangu wùmwe, nwamònu's, kàcìyi ne mènù to, ànu menemene.

244 Mémè ne: “Ngàmònu nsongàalùme kampàndà ùtwila mashi.” Mémè kubiikila, kwamba ne: “Kùshiyikù Billy. . .”

245 Kùdikù muntu kaaba aka uvwa ku—ku disangisha dyà ku Jamaïque adi kuntwaku musangu awu ku—ku Jamaïque, mu Kingston anyi? Ncyèna mwà kumòna to. Èyowà. Nyawù bàdikù bàbìdì. Ki dìbà adi. . .

246 Ki mémè kwamba ne: “Cìdì ne cyà. . . Billy, kùyì kuntwaku to. Ngàmònu nsongàalùmè kampàndà ùtwila mashi.” Ùvwa mbukwendè bwànyì wa balùme. Kuyayè, ùvwa ne mashi àlwa munda pàakafwà mamwèndè apu. Cìvwa ànu cimwenzè cikùmà cibì.

247 Pashìshe mémè mwimàne mwab'ewu ditùkù adi, mémè kwambula Bible ewu. Mémè kwamba ne: “Taatu, ncyèna mumanyè. Pàmwàpa cìdì ànu dinanga Dyèbè, Kùvwa mundejè diya dyèndè to. Kàdi ndi mucibùlùke bikolè, Nzambi. Udikù mwà kumpèesha ànu dīyì kampàndà dyà busàmbi mu Dīyì Dyèbè anyi?” Mémè ne: “Mbalèku ànu cintu kampàndà cìdì ciikàlè busàmbi, cyà cìnsàmbakù.” Mémè kulekela ànu Bible ùdìbuululukila mùshìndù *ewu*. Ki cyòcì aci, màleetà manène makùnze ne: “Kì mmufwè to, kàdi mmulàale tulù.” Ki mémè kubwela mu cibambalu. Twètù kuya mu tulù.

248 Lwà pa dìbà mwandamukùlù, mu dindà dyà pàakacyabù, mémè kujúuka. Bàvwa ne cyà kumulongolola, lwà pa dìbà nkànkàlà apu, ki twètù kupwekamù bwà kamumòna. Meda kupàtukayè bwà kuya kangacila bàna didyà dyà mu dindà, ne Joe mwàna ùdila mwadi. Becky mu ditumba, mutùngùnùke ànu ne kudila ne: “Ngaadyàkumònakù kàbìdì kaakù wanyì awu anyèè?”

249 Mémè ne: “Èyowà. Èyowà. Neùmumònè. Ùdì ànu dyàmwàmwa, wàbàndì bibàndilu.” Mémè ne: “Yèyè,

netùmumòne cyàkàbìdì.” Ne yéyè wa bwalu ùwwa munangè bânà bakesè abu, nudi bamanyè’s.

<sup>250</sup> Nènku, pa nànkù, ne bònsò bàvwa mu myadi ne: “Tudikù mwà kumòna kaakù mu mapingaja emu anyèè?”

<sup>251</sup> Mémè ne: “Nudi mwà kumòna mubidi wùvwàye musòmbèlemù, kàdi kaakù wàbàndi bwà kiikalayè ne kakwènù mukàji mukwàbò awu, bàdi muulu mu Dyulu.”

<sup>252</sup> Kadi Joe kàvwakù mufwànyine kucyùmvwà to, mwanàànyì mukesè wa balùme ewu, nudi bamanyè’s. Kàvwakù yéyè ànu mufwànyine kucyùmvwà to. Kwambayè ne: “Pashiishe kaakù neàtuulukè àlukilè dilòlò edì anyì’s?”

<sup>253</sup> Ki mémè ne: “To, to. Ncyèna mumanyè ne ndìbà kaayi dyàlukilàye to. Pààlwà Yesù apu, yéyè neàlukilè.”

<sup>254</sup> Nenku mvwa mwimàne mwaba awu. Ki mémè kukùdimuka, kubwela mu cibambalu amu. Kàdi pàngààbwedì... Kanùndòmbu bwà mémè kucyùmvwija to. Kakwènàkù mùshindù wà kucyùmvwija to. Mémè kudimòna mwimàne mwaba awu, mùshindù ànu wùmwèwùmwè wùndì mutàngile mu batéèlèji aba ewu. Ne mvwa ndombola misambu. Kacya ncìvwakù mwanjì kwenza aci to. Ncyèna nànsha mumanyè kwimba to, nànsha kakesè. Pa nànkù, nyawù pàvwa musùmbà munène wà bantu, munène menemene.

<sup>255</sup> Ku *elu* luseke, dì—dìbàlaasà adi òvwà òmwèka bu ne, òvwà pambèlu, kaa, ncyèna mumanyè munùdì nwènù bafwànyine kucìbìikila to, cyenzè bu kwìnshì kwà kakùnà nànkù, ne cyenzè mùtù nzùbu mwalàbàle wa sèndèmá amu. Ne cìvwa cìyè kule, milongo ayì’s, yìvwa mu mùshindù wà ne bìvwa bìkèngela kuyìbàndishabò mùshindù *ewu*, mu mùshindù wà ne bàvwà kule menemene mu ndekeelu abu bàvwa ne cyà kutàngila mùshindù *ewu*. Kàdi ànu munkaci amu... Ànu milongo yìsàtù cyanààna, mùshindù *ewu*. Ne lwà munkaci amu mene bìvwa ànu bu milongo miitèèkamù, ya bânà bakesè bàdi ne tunèkè, bacìbùkile panshi balààdika mu milongo ayi.

<sup>256</sup> Nènku mvwa muvwàle nkooci mufiikùlùke, mwikàle ngimba ne: “Lwàyi naabò mùneemu, lwàyi naabò mùneemu, lwàyi ne bânà bakesè kùdì Yesù.” Tutu twimba nànkù mu èkèleeziyà, bikolè, nangàngà mu dilàmbula dyà bânà. Nènku kùvwa, cyenzè bu ka—kazùbu mwaba awu, mùvwà bantu bàà bamanyìke bikolè basòmbèle, ne cyambilu cìvwa pabwìpi ne kòkù aku. Kàdi mémè mvwa kwìnshì aku, ndombola misambu. Ki dyàkàmwè, mémè mwimàne mwaba awu, nditàngila, dìbà adi... Kaa, kanùteeci bwà kunana lungènyì bwà kucyùmvwakù to, bwalu kanwàkucyùmvwà to. Pashiishe pàngààfikì *apa*, dìbà adi kulwaci *apa*. Ncyèna mumanyè to. Myaba yìbìdì ayi kwendelayì pàmwè. Nènku cìdì... .

Ncintu cìmpè pàdì bibìdì byèbè abi byèndela pàmwè.

257 Ndi ne cyamù cyà fòtò mwaba awu. Pâmvwà ngenda ndwa apu, ncivwa mumanyè mwà kukwàta fòtò to. Mémè kutàngila mu cintu aci, kàdi, mulùmýànà, mvwa mwà kumòna bintu bitaanu anyi bisambòmbò bishiilàngàne. Pa nàнку mémè kujaalamija ntántà wa dicimwèna. Billy kungambila, wàmba ne: “Jaalàmijà ntántà wa dicimwèna, ne byònsò bidi bìlwa cimwèpelè.”

258 Mmeeji mimpè bwà kwenza nàнку, nudi bamanyè's. Udi umòna bintu bishiilàngana paudi ubanga kujaalamija ntántà wa dimwèna apu. Nènku kwàta mudimu ne Dìyì dyà Nzambì bu cijaalamiji cyà diMumwèna, nènku neù—neumonè cìndi ngamba aci. Kàdi anji Dyǎngàtè mu dijaalamija dyà dimòna, dyàmbedi, wamònu's.

259 Nènku mémè mwimàne mwaba awu, ntàngila, ki mémè kubwela mu cikèènà-kumòna aci. Ne pâmvwà mwòmò amu apu, mémè kumòna muntu wa mwendè luumù wàlukila lwà mu ndekeelu mwà mwaba awu. Ne bòbò bàvwà... Mémè kwamba ne: “Èè, ùdi ùlwa ku kazùbù kàà bantu bamanyike bikolè kwàka.” Ki kulwaye wènda wènda mùshindù ewu. Ki mémè kudyàmbedila ne: “Èè, nêngǎnji kwimba kàbìdi pàdi inǎbànzà wàwa wènda ùlwa pààpa.” Úvwa muvwàle mvwàdilu wa cyena-kale.

260 Mpindyewu, bàmwè bàà kunùdi nwènu bainǎbànzà nenùvulukè cyòci eci, pàvwàbo bàvwàla jipè yà mùshindù kampànda, bu mùdi, lwà apa, ùvwa mupwekè too ne kwinsì lwà kumutù kwà bisàbaatà byà nshinga abi. Ne bàvwà ne cintu cyà mùshindù... Nutu nubìikila bintu abi ne mbinganyì, cyà bwena—cyà bwena cìdi inǎbànzà udi apa ewu naaci mpindyewu eci? Bùluuzè bwàbwa. Bùluuzè, cimwè cyà ku bintu byà mùshindù awu abi, ne cìvwa ne mabòko male menemene. Nudi babìvùlùke anyi? Ne bùvwa bùbànda ne ku nshingù eku, ne mbòta mukèsè wa mùshindù kampànda wa cintu ciikàle cibwela munda emu. Pashìishe, mwàsè cifulu cinène menemene, cibùnya ku luseke. Nènku bainǎbànzà, mu matùkù awu, bàvwà ne nsukì mile. Pa nàнку bàvwà bàyìkòka kwinsì mùshindù ewu, ne bààsapù cifulu, ne bààsapù mpengèle, nudi bamanyè's, bwà kucìlamapù, bwalu bìvwa bìkèngela bwà kubàndabò pa kabalù ne mikòlò mitùma luseke lùmwe ne bikwàbò.

261 Nènku inǎbànzà ewu ùvwa wènda ùseemena, ne bantu bònsò bàvwà bàneemeka inǎbànzà ewu. Ki mémè kudyàmbedila ne: “Èè, ùyaaya ku kazùbù kàà bantu bàdi bamanyike bikolè aku.”

262 Pa nàнку, dìbà adi, mémè ne: “Bwà musangu ewu kàbìdi, bònsò bàdi elu luseke abu: ‘Lwâyi naabò muneemu.’ Mpindyewu lwà kùneeku: ‘Lwâyi naabò muneemu.’ Pashìishe bònsò bàdi munkaci, bònsò pàmwe mpindyewu: ‘Lwâyi ne bânà bakesè kùdi Yesù.’”

263 Ndi mwenzè ànu ngamba nàнку, inǎbànzà ewu ùkaavwa mumbè mubwelè ne mu kazùbù aku. Mvwa mwà kumòna ne,

pààkabwelàye mu kazùbù aku, bantu bònso bààkajuuka kuulu. Ne bàvwa bu bàdì bènza nùnkù ewu, bamusekelela, ne yèyè ùbàsekelela.

264 Mémè kudyàmbidila ne: “Èè, dîbà dyàkànyì dyà mémè kuyiisha. Nènye kasambidila babèèdì bàba.” Mémè kubànda mu—mu cyambilu emu, nùnkù ewu, ne kazùbù aku kàvwa ànu, kaa, pabwípì ànu mùdì mwanèètù wa balùme udi musòmbe apa ewu. Ki mémè kukùdimuka, mùshindù ewu.

265 Mémè kudyàmbidila ne: “Èè, mpindyewu, inábànzà wàwa neinamè kumpalà kwànyì, bwà ngaamòna ànu mwà kumusekelela.” Nènkù ndi mwenzè ànu nkùdimuka anyì, yèyè ùkaavwa mumanè kwikala ne mutù wèndè mwinyika, nunku ewu. Mémè mvwa ngiinyika mutù, nùnkù ewu. Ne pàngàbàndulukù, musangu wùm wèwùm wè awu, ntwilangana nendè, ùvwa m’aman, nsongààkàjì, mulenga wa dikèma.

Mémè kumutàngila. Mémè kwamba ne: “Maman?”

Yèyè ne: “Billy.”

266 Ne ànu dîbà adi, mikenyi kubangayì kwela myaba yònsò mu citanda amu, mikungulu yìdila, ne dinyùkusha kulwadì. Ki Dîyì kwambadi ne: “Kùciinyì bwà mamwèbè to.” Dyòdì ne: “Ùdi mùshindù wùm wèwùm wè wùvwaye mu cidimu cyà 1906 awu.”

Ki mémè kwamba ne: “Cinyì, cidimu cyà 1906?”

Ki Meda kwabayè ne: “Mbwalu kaayì ebu wèwè’s?” Mukàjàànyì.

Mémè ne: “Munanga wanyì, cidimu cyà 1906, cidimu cyà 1906 cìvwa ncidimu kaayì aci?”

Yèyè ne: “Bwà cinyì?”

Mémè ne: “Mu cìkèènà-kumòna, ndi mumòne maman mwimàne ànu mwaba ewu mene.”

Yèyè ne: “Wèwè kumòna cinyì?”

Mémè ne: “S’ndi mumòne maman.”

Yèyè ne: “Bushùwà anyì, Bill?”

267 Mémè ne: “Èyowà’s. Yèyè’s ùvwa mwimàne mwab’ewu mene, ne ùvwa mulenga wa dikèma. Ki Yèyè kwamba . . .” Mémè ne: “Ùvwa ànu nsongààkàjì wetù ewu’s.”

268 Ki mémè kuya kangata bibùcilu byà kale byà fàmiyè. Nudi bamanyè cìvwaye mu cidimu cyà 1906 amu anyì? Mukàjì-musèla wa tààtù. Ki cidimu cyàkasèdiibwaye. Mpindyewu ùkaadi citùpà cyà Mukàjì-musèla mukwàbò, Mukàjì-musèla wa Mukalenge Yesù.

269 Muntu kampànda wa ku mwaba kampànda mmuntùmìne cìcyelè cyà meeyà àtaanu. Ndi naaci mu mpaayà mwànyì emu, cyà mu cidimu cyà 1906.

270 “Ne Yéyè, Nyumà Mwímpè, pààlwàYe, Yéyè neànùbuulwile maalu àndi Mémè mwambè aa, ne neànùleejè maalu àcìvwavwà.”

271 Mpindyewu, ncinyi aci? Lwendu lwà bulembi lùvwa ànu lùngiibaka cyanààna, nudi numòna’s. Lùmwe lwà ku ngendu yà mitambe bwímpè yínkaadiku mwenzè, mumanyè eci, cikùminà cinène eci. Cìvwa ndinanga. Nènkù, mwanèètù wa balùme, mwanèètù wa bakàjì, piikalàbi ne bikèèna-kumòna bikwàbò byònsò ebi bivwa ànu mu byòbì menemene, byà cìdi Nyumà Mwímpè muleejè, cìdi ne cyà kwikala Nyumà Mwímpè. Bible mmwambè, ne: “Cyòci cyenzèke, díbà adi ùvwa n’Yéyè.”

272 Díbà adi, ditèkemena kaayipu ditùdi naadi’s wè! Dìngà ditùkù twadyàkushiyangana ne mwaba ewu. Netwàlukilè ku nsongààlùmè ne nsongààkàjì, bwà katùciyikù mwà kufwà kàbidì to. Mbímpè ngiikalè mumanyè nànkù pamutù pàa kumanya ne nèngiikalè mfùmu wa buloba bujimà ne kwikala ne mwoyi bidimu mùliyò mujimà. Mbitàmbe bwímpè ngiikalè mumanyè ne ndi mu cyanza cyà Nzambi.

273 Ne ndi ne disànkà dyà kumanya, dilòlò edi ne, Yesù umwèumwè wàkamba díyi adi awu, Ùdi kaaba aka, paanyimà pàa bidimu binunu bibìdì. Nwamònu’s, kaCyènakù mwà kubùtuka to. N’Cyà Cyendèlèlè. Ne Yéyè ùdi ànu Yesù umwèumwè awu dilòlò edi mùvwàYe ditùkù dyàkambàYe díyi edi amu. Ne Yéyè neàtungunukè ànu ne kushindika Díyi adi, bu twètù mwà kuDìitabuujà. Nudi nwitabuujà nànkù anyi?

274 “Yéyè, Nyumà Mwímpè, pààlwàYe, Kàakudyàkwila to. Kàdi neÀngatè maalu, a kùndi Mémè,” ki Díyi ndyòdi adi, “ne neànùleejèwu. Ne pashìshe, kàbidì, Yéyè neànùleejè maalu àcìvwavwà.”

275 Mu Mukàndà wà—wà Ebèlù, nshapità mwi4, Bible mmwambè ne: “Díyi dyà Nzambi nditwè. . .”

276 Mpindyewu, Díyi divwa Nganyi? Yesù. “Ku cibangidilu kwàkadi Díyi, ne Díyi dyàkadi ne Nzambi, ne Díyi dyàkadi Nzambi. Díyi dyàkavwijiibwa mubìdì. Dyàkasòmbela. . .”

277 “Díyi dyà Nzambi nditwè kutàmbe mwelè wà mvità kanà wònsò, ditùbula too ne ku dipandulula, too ne ku bwongò bwà mifùbà, ne Dijinguludi dyà meeji a mu mwoyi.”

278 Ki wetù Nzambi nyawù. Katwèna bajìmine to, balundà bàanyi. Tucidi ànu mu ngàsà wa Nzambi. Ndi—ndi ndyùmvwa, bwà kwakula bwà cintu kanà cyònsò, ne kwakula pa cikondo cyà kale. . .Ne ànu mungàmbi makèèlèlè dilòlò amu, mùvwà bayiidi abu bàteeta bwà kwikala ne mwoyi ku disangisha divwàbo naadi ditùkù divwà didyànjlè, bindilè dikwàbò, kàdi bapwè mwoyi ne Mufùki mene wa cipeepèlè ne mavwala awu nguvwa mulàale mu bwàtù abu awu.



279 Nzambi uvwa kuulu kwà mikùna ayi awu, bwà kutèeka ours wa lwonji wa cisengàsengà awu, bilondèshile Dìyi Dyèndè, aci's cìdi cìsanganyibwa kwàka panshì apu, bu cileeeji.

280 Mpindyewu, wèwè uringa kufùndila muntu awu mukàndà, fùndilà ànu Bud Southwick, S-o-u-t-h-w-i-c-k, Bud Southwick, Fort Saint John, Colombie Britannique, kàdi yèyè àkufùndilè dyandamuna mu mukàndà. Ne byôbi biine, wèwè muswè kuya mu lwendu lwà bulembi, ki muntu mwîmpè wa kuya nendè nyèyè awu.

281 Mpindyewu mōnaayi. Yèyè mmucilondèlàngàne munkaci mwà bilembi byōnsò mu njila mujimà amu, mu mùshindù wà ne ndi ngeela meeji ne nêngènzè disangisha ànu dyètù dyà cyà bushùwà edi musangu wàlondà wùngààyàku, ànu ne balombodi pa bôbò, èyowà's, pa kumōna bintu abi byènzeka mùshindù wùdibi byènzeka ewu. Aci civwa ncidimu cishààle eci.

282 Eci ng'eci cidimu, mpindyewu mene. Yesù umwèumwè wàkafila mulayi awu awu, wàkamba ne: "Ncyàkunùshiya ne ncyàkunùlekelakù to. Nèngiikalè neenù misangu yōnsò, too ne ku ndekeelu kwà buloba." Nudi nwitabuuja nàнку anyi?

283 Ne bileeeji byà mùshindù awu, ne bulelèlà bwà mushindù awu bushindika, bulelèlà bwà cyà bushùwà, mmunyi mutùdiku mwà kudyumvwa mùshindù mukwàbò kanà wōnsò kawùyì wà bafwànyine ànu kunanga kupicila mu musàkà wàwa, ne kwambwibwa? Tukàadi balekèle bintu byà pa buloba bitùcipàje, mu mùshindù, wà ne, tudikù tumōna bintu byà musinga mutàmbe bunènè bìdì bilelèlà, bijaadikiibwe ne m'bulèlèlà ebi anyi?

284 Mpindyewu, mubèèdi yōnsò mwab'ewu, bu wèwè ànu mwà kwitabuuja ne Yèyè umwèumwè wàkafila mulayi awu awu, ne ku Yèyè umwèumwè wàkuumusha disaamà dyà ciseki adi pa nsongàalùmè awu, muntu awu, Yèyè awu n'Nzambi umwèumwè awu udi mwab'ewu mene mpindyewu. Bu ne mèmè mvwà kukuumushaci, mvw'a kucyènzà, kàdi ncyèna mwà kucyènzà to. Yèyè ùkaadi mumanè kukupetela cyôci aci, ne cintu cimwèpelè cìdi cikèngela bwà wèwè kwenza nkuciitabuuja.

285 Anjì ambààyibi tǔng bu ne nsongàalùmè awu ùvwa mupalùke, ne mukàjì mukesè awu kwambayè ne: "Mpindyewu, bwà mutèèlù awu mwab'ewu bùdi penyì?" Pàmwàpa kacivwakù cifwànyine kwenzeka pa muntu mukwàbò nànsha umwe to. Nwamònu anyi? Ànu pa yèyè awu, bwalu civwa cimutùmina yèyè. Naamànà wàkadyèla mu musùlù awu misangu mwandamutekète; kàdi mukwàbò muntu, ùdyèlamù, kàvwa pàmwàpa mwà kwondopiibwa ku nsudì yèndè to. Nwamònu anyi? Kàdi mōnaayi. CìdiYe Yèyè wàmba ki cìdi bulelèlà, bulelèlà bushindikiibwe, bupwàngàne.

286 Mpindyewu, dîbà dîkaadi dyènda dipîta, bwà kubîikilakù nànsha mulongo wà babèedi. Twànji—twànji twimanyikàayi aci bwà katanci kakese cyanààna.

287 Twèlanganàayikù ànu meeji cyanààna. Cyôci aci ki cyàkalayà Nzambi anyi? Nyumà Mwîmpè mushùwashùwàlè's ngudi mufwànyine kwenza aci. Ncyà bushùwà anyi? Èè, nganyi udikù mufwànyine kwamba ne Kàvwa Nyuma Mwîmpè? Úvwa n'Yèyè. "Mémè ne Taatù Wanyi tudi Umwe." Nyumà Mwîmpè nguvwa Tatw'Èndè. "Nsongààkàjì awu neàlèlè. Cintu cyà Cijila cidì ciimicîibwe munda mwèndè aci ncyà kùdi Nyumà Mwîmpè." Nànku, Nyumà Mwîmpè ne Nzambi bàdi Nyumà umwèpelè awu, ne Yèyè nguvwa munda Mwèndè.

288 Kàdi tàngilàayi nùmonè cyàkenzàYe pààkalengà mukàjì kampànda civwàlù Cyèndè, pààkatàngilàYe pa batèeleji ne kujingulula meeji àbò apu. Dìyì kadyèna dyàmbakù, ne: "Dìyì dyà Nzambi nditwè kutàmba mwelè wà mvità wà nseke yìbìdi, Dijinguludi dyà meeji a mu mwoyi" anyi? Yèyè kènà ùlayakù, mu Yone Munsantu 12, awu Yone Munsantu 14.12, ne: "Ewu udi ungiitabuuja Mémè, byenzedi bìNdi ngenza yèyè neàbyènzè pèndè" anyi? Anyi, kacya cikaadikù cipangile, kàdi kacyi bulelèlè anyi?

289 Nànku, Nzambi ùdi kaaba aka. Ùdi kaaba aka bwà kusàngaja muntu yònsò udi kaaba aka. Ùdi kaaba aka bwà kusàngila musùkà wònsò wùdì mujìmine. Ne kumpàlà kwà kwenza dibîikila dyà ku cyoshelu, mùndì ndyùmvwà mulombòdîibwe, nwamònu's, bwà kwenza dibîikila dyà ku cyoshelu edi, twànjàayi ànu kuMusòka Yèyè. Mbanganyi bàà kunùdi bàdikù baswè kujìmija, anyi kwamba ne: "Bu mémè mwà . . ." Pàmwàpa beenyi bàdi mwab'ewu, bàdi bàmba ne: "Ncítukù mwanjì kumòna òmwè dyà ku masangisha awu to. Nkààdikù—nkààdikù muumvwè bantu bàmba bwà bintu ebi, kàdi kacya ncyà bushùwà ne ncítukù—ncítukù mwanjì kubimòna to. Mbifwànyinekù kunkolesha ku mwoyi bu mémè mwà kumòna Bwikadi mene bwà Kilistò búlwa munkaci mwà bantu ne bwènta cintu cimwècimwè cyàkenzàYe Yèyè aci." Ncifwànyinekù kunùkànkamika anyi?

290 Twìnyikàayi mitu yètù; dìyì kampànda. Disù dyònsò dibwita. Mpindyewu shìllaayi Nyumà, udi ulonda Dìyì awu.

291 Mpindyewu, Taatù, mémè, ku dyànyì pàanyì dimanya, Wèwè ngudi mumanyè mwoyi wànyì. . . Bu mùdìbi ne bantu aba bàdi bàtata mu luuyà lukolè elu, ne mbapàte patapata, biimàne kuulu, kàdi mbaleejè lutùlù lwàbùngì. Ndi mwà kudifwànyikijila ne wùvwà mmusùmbà wà mùshindù wumwèwùmwe wùvwà mwimàne ku mwelelu wà màyi ditùkù adi biikàle bàKutèeleja wakwila mu bwàtù. Ne pashìshe Wèwè kubàmbila ne: "Sàkaayi bwàtù mu màyi a ndòndò nwèlè

bukòndò bwà dilòba.” Kabiyi ne mōnaayi ní mùdi mishipa to. Yìvwamù.

<sup>292</sup> Ne mùshindù mwinè wùvwà mèyì a musinga mukolè a mùpostòlò awu mambè ne: “Mukalenge, tudi balòbe ne bukòndò bwà cyàtá bufùkù bujimá katùyì bakwàte kantu to; kàdi nànsha nànkù, ku Díyì Dyèbè netùpwekeshè bukòndò.” Nènku pààkatùmikilàbò Díyì Dyèbè, bàakabooya mìntùtá ne mìntùtá yà mishipa, mu mùshindù wà ne makòndò àbò miinè àkaavwa àmba kupandika.

<sup>293</sup> Mukalenge Yesù, kakùyì mpatà to bakàjì bààbùngì bàvwa bashiye byà disukula mu dindà adi, balùmè bààbùngì bashiye madimi àbò, byà dipòlò, balobi bashiye makòndò àbò, bwà kutèeleja Díyì dyà Nzambi. Mukalenge Yesù, bu ne Wèwè uvwa kaaba aka mu mmwènekeli wa mubidi dilòlò edi, mbyà dyela mpatà mikolè ne, kùvwa kufwànyine kudìsangisha bantu bapìte bàdi badìsangìshe aba. Kàdi bantu aba bàdi bìtabuuja ne Wèwè kwèna mufwè to, kàdi Udi mubiishìbwe ku bafwè, ne Udi umwènesha Díyì Dyèbè ne ushààla mukwàte ku Díyì Dyèbè, Díyì dìngàbàbadìdi mu Mifundu yà cijila dilòlò edi eyi.

<sup>294</sup> Ne ànu mwàkapèeshàbò musangu kampànda Mukalenge wetù Bible, anyì Mukàndà muvùnga awu—awu, ne kubala Yè, ne kusòmba Yè. Ki kwamba Yè ne: “Ditùkù edi Mufùndu ewu wùlù.”

<sup>295</sup> Enzàku bwà cyènzekè cyàkàbìdi, Mukalenge. Byènzekèku cyàkàbìdi ne, ditùkù edi mene, dilòlò edi mene, Mufùndu wùngààbadi ewu wùlè. Ne twètù bònsò tudi balongèshe, munda mwà lumingu lujimá elu ne, cìvwa ne cyà kwikala cintu ciinè cìvwà ne cyà kujaadika cikondo cyà nshìikidilu aci. Ne pashiishe myoyi yètù neyùmukè, yìye ne disànka.

<sup>296</sup> Kùdi mwà kwikala bààbùngì kaaba aka, Mukalenge, baùdi Wèwè wakula naabò. Tùkwàcìshèku dilòlò edi bwà kumanya Díyì Dyèbè, Díyì Dyèbè didi dishìndika ne didi m’Bulelèlà adi. Enzàku nànkù, Taatù.

<sup>297</sup> Ne patùdi ne mitù yètù miinyika apa, ànu mu mùshindù wà mmwèneni mucincinka apa, bwà kuditùujàkù ku kuyiisha. Mbanganyì bàà kunùdi mwaba ewu, bàdi kabàyi menemene beena Kìlistò balediibwe cyàkàbìdi? Mpindyewu, udi mwà kwikala uya mu èkèleeziyà, kàdi kí ng’aci cìndì mèmè nkonka nànsha. Udi . . . Wèwè kùyì mwena Kìlistò mulediibwe cyàkàbìdi to, kàdi mwikàle wìtabuuja ne kùdi Yesù udi ne mwoyi, Nyumà Mwîmpè mulelèlà, ne uringa bwà bàkuvùlùkè kùdi Yè mpindyewu, udikù ànu, pàcidi mutù wònsò mwinyika mpindyewu, ne mèsù mabwita apa, mwà kwela ànu cyanza cyèbè muulu kudi Yè ne: “Mukalenge, wamvùlukakù” anyì? Nzambi àkubènèshè. Nzambi àkubènèshè, ne wèwè, ne wèwè. Nzambi àkubènèshè. Nzambi àkubènèshè. Abi’s mbilenga be. Kùdikù bakwàbò anyì?

298 Mpindyewu, katwèna bààbúngì menemene to. Kàdi, nudi bamanyè ne, bàà pa buloba mbàdi bàkèbangàna ne bintu binène ne midità ne midità yà bantu anyi? Bu mutwám̄bi dilòlò dyà makèlèlèlè ne, kàvwà ànu kaadíyì kakesè kabwengètèke, ki kààkakòkà muprófetà bwà kuseemenayè ne mpàla mubwikila.

299 Mpindyewu, ikàlaayi ne diitabuuja kùdi Nzambì. Mwanèètù wa balùme, mwanèètù wa bakàji, ikàla ne diitabuuja kùdi Nzambì. Nènku bu Mukalenge wetù munènè, Yesù wa musàngeelu awu mwà kulwa mwaba wùdi Dìyì edi ditèèkìibwe ewu, Dìyì Dyèndè Sungasunga, dibuulula, ne kunùjaadikila ne Nyumà Mwìmpè ewu, ùndi ngamba ewu, ùdi Bulelèlè! Udi mufwanyine kwikala mupetè cibwejàkàji misangu yàbúngì mu bintu byàbúngì, kàdi bìdi bìlejeja ànu ne kùdi Cilelèlè mu mwaba kampànda. Ne pàdiYe wènza cyòci aci, ndi muswè bwà nwènù bèdi byanza muulu abu, nùlwe, numonanganè naanyi, bwà katanci cyanààna.

Mpindyewu nudi mwà kubàndulukaayi.

300 Mukalenge Yesù, angàtaku disangisha edi mu byanza Byèbè mpindyewu. Mèmè ndi musadidi Webè. Ne diyìisha dyònsò adi. . . Dìyì òmwè cyanààna dyà Kùdi nediiikalè ne musinga kutàmba byònsò bitùdiku twètù bafwanyine kwamba mu nsòmbelu wetù mujimà; Dìyì òmwè cyanààna. Enzàku nànkù mpindyewu, Taatù, pàndi ndàmbula cyòci eci, majaaniki awu apa. Wèwè's udi mumanyè ne mmalelèlè, Taatù. Wèwè ngUvwa muàfile. Ne kacya kabitukù byanjì kupangila to. Enzàku nànkù, mu Dìna dyà Yesù. Amen.

301 Mpindyewu, mbantu kaayi mwab'ewu, bàdi kabàyi ne twartà twà disambila, biikalè bàsaama? Elàayi byanza byènù muulu, myaba yònsò mu citanda, aba bàdi kabàyi ne twartà twà disambila, ne babèedi. Èyo. Nènku aba bàdi ne twartà twà disambila abu, elàayi byanza byènù muulu. Ànu bu bàdi búngì bwà mwòmùmwè. Ne bònsò mbasambàkane.

302 Mpindyewu, bwà kutàngila pa batèeleji, dyàmbedi, bwà kwikala ne meeji matòoke kumpàla kwà Nzambì, ne kumpàla kwà. . . kwènù nwènù. Ndi mumanyè ne, ndi munkaci mwà kutàngila *apa*, kùdi bàmwè balundà bàànyì basòmbe mu *edi* ditumba. Mwanèètù Noel, wendè—wendè. . . ne Mwanèètù wa bakàji Jones, ne Mwanèètù Outlaw, mwanàanyi wa balùme, bàna bèètù bàà balùme *aba*, ne Mwanèètù Moore. Ncyèna mumanyè mwanèètù wa balùme *ewu* to, kàdi nkàadikù mumumòne mu masangisha, ndambù wa misangu mishààle eyi. Ncyèna mwà kumanya dìnà dyà mwanèètù wa balùme *ewu* to, nànsha yèyè, kàdi ndi mumumanyè ànu mpàla. Mwanèètù wa bakàji udi *apa* mene ewu, Mwanèètù wa bakàji Williams. Mwanèètù wa bakàji Sharrit musòmbe mu ditumba. Paanyimà menemene mu ndekeelu mwàmwa mùdi bàmwè bantu bàà ku tabernacle mu Jeffersonville.

303 Udi musòmbe ànu apa mene ewu mmulundà wanyì wa kale wa musinga mukolè, wa bidimu makùmì citèemà, udi mufùmìne ku Ohio, wèndesha kàshinyì ùkòsolola ditunga dijimà. Ne mèmè nèngùumukè nye ku Àfrikè, kàdi yèyè ne mukàjèndè mulenga awu mbandòmbe ní bàdikù mwà kuya naanyì ku Àfrikè. Bambè ne: “Netufutè . . .” Ne bidimu makùmì citèemà, mwanèètù wa beena Allemagne, uvwa kacya kàyikù mumanyèku Mukalenge to. Pàngàakayiishà dilòlò kampànda, kulwayè ne bilàmbà byèndè byà bimpè pambidi, bwà kubàtijiibwayè. Ne bidimu makùmì citèemà’s! Pa kuumusha . . .

304 Ngeela meeji ne, kaa, ewu m’Mwanèètù Waldrop ne Mwanèètù wa bakàji Waldrop bàdi basòmbe pààpa bàbà. Mpindyewu, ki pàmwè ne bònsò bwà bāndi . . .ne Mwanèètù Borders. Mpindyewu, aci mpàmwè ne bònsò.

305 Mpindyewu, s’nyawù mbàtèèla mu mènà. Mpindyewu, nwènù bàdi bammanyè mùshindù awu abu, kanùsambidi to. Nwamònu anyi? Nùnsambidilaayi mèmè. Nwamònu anyi?

306 Kàdi ndi muswè bwà nwènù bàdi kanùyì bammanyè, ne bamanyè ne mèmè ncyèna munumanyè abu, ndi muswè bwà wèwè kwamba mu mwoyi wèbè ne: “Mukalenge Yesù, nkàadi muumvwè bàlonda bwà cyôci eci. Ndi—ndi mutèèlèje mwambi ewu ùbala cyôci eci mu Bible. Ngàtèèleji majaadiki awu, ne nkàadiku muumvwè a mafwànàngàne, udi mumanyè, a bikondo bishiilàngàne bìvwà cyôci eci cyenzèke. Tukàadi pabwìpì ne nshìikidilu mu mùshindù awu anyi, Mukalenge? Tukàadi pabwìpì mu mùshindù awu anyi?”

307 Vùlukàayi ne, pààkenjiibwà cimanyinu aci bwà Sodomà, cimenga cyàkooshiibwà aci, Yesù wàkaleedilakù, wamba ne: “Ànu mwàkadìbi . . .” Aci ki cìvwà cimanyinu cyà ndekeelu cyàkapetàbo kumpàlà kwà cimenga aci kubùtudiibwaci. Ne Yesù wàkamba ne aci ncyènzuludiibwè ku dilwa dyà Mwànà wa muntu.

308 Mpindyewu, nudi bamanyè ne aci ncyà bushùwà, mùvwà cyôci aci . . .Nzambì awu, Nzambì mu mubidi! Mbanganyi bàdi bamanyè ne ùvwà n’Nzambì wàkula ne Abraham? Eyowà. Èè, Bible ùdi wamba ne, “Elohim,” pa nàнку, awu—awu m’Mufùki mu—mu—munène wa maulu ne buloba, Udi udikumbanyina mu byònsò awu. Ki cìvwàYe.

309 CìvwàYe ùleeja aci ncinyi? Ùvwà mu mubidi wà buntu, mwimàne mwaba awu ùdya munyìinyi wà kànà kàà ngombe, ne ùnwà mabèlèlè a ngombe, ne uvwa mwà kujìmina ku mèsù awu. “Nènkumwènèkèle bilondèshile cikondo cìNdi mukulayè aci.” Nwamònu anyi? Wàkamubiikila mu dìnà. Ne Yèyè mwelè nyimà, kwamba ne: “Sarah ùdi penyì?”

Yèyè ne: “Ùdi mu ntentà paanyimà Pèèbè apu.”

Yèyè ne: “Nènkumwènèkèlè bilondèshile cikondo cyà mwoyi.”

310 Ki Sarah ne: “Hmm, hmm,” paanyimà mu ntentà amu.

311 Yèyè kwamba ne: “Sarah wàsekì bwà cinyì?” Vùlukàayi ne, Bible mmwambè ne ùvwa mu ntentà paanyimà Pèndè. Yèyè ne: “Sarah wàsekì bwà cinyì?”

Sarah ne: “Ncyèna musekè to.”

Yèyè ne: “Èyowà’s, s’wàsekì.” Nwamònu anyi? Ncyà bushùwà.

312 Muntu mwimàne mwaba awu, Nzambì muDìleejè mu mubidi wà buntu. Yesù mmwambè ne necìikalè cintu cimwècimwè aci ku dilwa dyà Mwànà wa muntu: Nzambì mu Èkèleeziyà Wendè, wèwè, mèmè, ùDìleeja’s. Mpindyewu, kùvwa mukàji mukesè kampànda . . .

313 Pàvwà Nzambì munda mwà Kilistò, Yèyè ùvwa ne Nyumà mu kaabujimà. Ùvwa Nzambì. Mèmè ndi ànu umwe wa ku basadidi Bèndè, ne wèwè udi umwe wa ku basadidi Bèndè. Tudi ne—ne Nyumà mu—mupima. Yèyè ùvwa Nendè kàyi mupima to. “Munda Mwèndè mùvwa kaabujimà kàà Bunzambì mu mùshindù wà mubidi.” Munda mwànyi mèmè mùdi ànu kaadipà kakesè cyanààna, mu wèwè mùdi dipà, dyà kùdiYe. Kàdi, nànsha kiikàle kakesè kàà bishi, n’Nyumà umwèumwè awu.

314 Mpindyewu, aci cyòci Nyumà wa Nzambì, Yèyè neenzè byenzedi byà Nzambì. Mpindyewu, wèwè sambilà wamba ne: “Mukalenge Yesù, mukàji mukesè musangu kampànda wàkalenga civwàlù Cyèndè.” Ne twètù tudi twamba . . .

315 Mu Dipungila Dipyadìpyà emu, mmwambè mu Ebèlù, mmwambè ne: “Yèyè ùdi Mwakwidi Munène mpindyewu mene, udi mwà kulengiibwa ku dyumvwa dyà matekètè ètù.” Mbanganyi bàdi bamanyè ne aci m’Bible? Ambàayi ne: “Amen.” [Disangisha didi dyamba ne: “Amen.”—Muf.] Bushùwà. Èè, aci cidi ne cyà kwikala cilelèlè.

316 Èè, pìikalàbi ne Yèyè ùdi umwèumwè awu makèèlèlè, leelù, too ne kashidi, mMufwànyine kukwandamuna bishi? S’ànù byà mwomùmwe ne mwàkenzàYe makèèlèlè amu, pìikalàbi ne Yèyè ùdi umwèumwè awu leelù.

317 Mpindyewu, udi usambila wamba ne: “Mukalenge Yesù, enzà ndengèku civwàlù Cyèbè. Ne pashiishe, Wèwè udi mupèèshe Mwanèètù Branham kaadipà kakesè, bwa kutùkànkamika. Ne yèyè kî mmummanyè mèmè to. (Nyewù ndi musòmbèle paanyimà menemene *apa*; ne lwà *apa*; ne *apa* nùнку; ne mwaba wònsò wùndi musòmbèle awu . . .) Yèyè kî mmummanyè to, kàdi Wèwè udi mummanyè. Nènku enzàku mmonè Nyumà Webè wa butùmbi awu, Mukalenge. Kabiyi bu ne ndi ne cyà kumòna to, kàdi ànu bwà kunkànkamikakù mèmè ne bakwàbò abu, bwalu twàbadì Dìyì. Enzàku ndengè civwàlù Cyèbè, pashiishe Wèwè wàdamunè buludì. Swàku ukwatèku naanyi mudimu dilòlò edi, Mukalenge, mu kiipàcilà aku. Necileejè batèeleji bònsò ne

Wêwè ucidi ne mwoyi.” Abi mbifwànyine kwikala bilenga be bu Yêyè mwà kwenza nàнку anyi?

318 Mpindyewu, udi ànu usambila mu mùshindù kampànda, wêwè mwinè, mu cimùmà. Ambà ne: “Mukalenge, enzàku ndengè civwàlu Cyèbè.” Nèнку mèmè nèndilekèlèlè kùdi Nyumà, ne pashiishe Nyumà Mwímpè ènzèku bìdi bishààla abi. Bwalu, mpindyewu, mèmè ngàkùlù, ngáfidi bujaadiki, kàdi ncyèna ne cikwàbò cìndi mwà kwenza mpindyewu to. Ngàshiikidi.

319 Ndi mèmè ntàngila ànu batèèleji cyanààna, bwà kumòna ní ndi. . . Bikèngela ncimòne, nudi bamanyè’s. Aci kaayi nudi nuumvwa.

320 Paanyimà lwà ku dyàbakàji dyànyì, paanyimà menemene, lwà munkaci mu ndekeelu mwà citanda, mùdi muntu mukàji mwikàle ùsambila. Ùkaadi pabwìpi ne kufwà, Nzambi kàyi mumukwàcishe. Ùdi ne kànsèrè, ne kànsèrè aku kàdi pa dibèèlè dyèndè apu. Kaa, kacimupicikù to!

Nkwàcishèku, Éyi Mukalenge.

Mwanèètù wa bakàji, bu wêwè mwà kwitabuujakù’s! Kaa, ekèlekèle! Cyôci’s necimupitè.

Mukalenge Yesù, tükwàcishèku, nyewù tulòmba.

321 Mary May. Ki bwalu mbwòbù abu’s. Katwèna bamanyàngàne muntu ne mukwèndè anyi? Ncitu mukumanyè to. Wêwè kùtu mummanyè to. Bwalu bùvwà mbwòbù abu anyi, ne cidi. . . byònsò byàmbiibù abi mbilelèlè anyi? Nàнку, itàbùùjà. Nebijikè. Amen.

322 Mpindyewu, pamutù pa mîdimà yìvwà pa yêyè ayi, cikaadi mbukènkè. Ànu mùvwàbi bulelèlè bwà mwàna wa balùme awu, disaamà dyà ciseki adi dyàshàadi kule nendè. Nzambi umwèumwè awu, Uvwa mu diitu dyà ku nord kwàka awu, ùdi Nzambi umwèumwè awu kaaba aka. Tùngunukà wêwè ànu ne kwitabuuja. Amen. “Bu wêwè mwà kwitabuuja!”

323 Ki Cyôci eci kumutù kwà muntu mukàji udi musòmbe kumpàlè kwànyì eku ewu. Ùdi ne cintu kampànda cimusaama mu mwongo. Ndinungu dimupampàlamùke, mu mwongo. Yêyè—yêyè kí ngwa mùneemu to. Ngwa ku Montana. Dìna dyèndè m’Màndàmù Stubbs. Juukilà kuulu, akidilà dyondopa dyèbè mu Dìna dyà Yesù Kilistò.

Kabyèna bikèngela bwà wêwè kusàkà maalu ku bukòlè to. Dilekèlèlè.

324 Muntu wa munène musòmbe kaaba aka, muntàngile, wènta nùнку. Itàbùùjà. Neùsangalè. Udi ne disaamà dyà mutu wùnyùnguluka. Wêwè mucitàbùùje, Nzambi neàkusàngàjè.

325 Inàbànzà ne disaamà dyà bânà bakàji. Itàbùùjà nàнку, nèнку udi mwà kusàngala. Alùkilà kwèbè kumbèlu, ne ikàlè ne diitabuuja kùdi Nzambi. Ngàmbi ne alùkilà kwèbè kumbèlu

bwà cinyi? Nebikukèngèlè bwà wàlukilè ku Nouveau Mexique, bwà kukakùfika. Mukalenge ne Mándàmù Watkins. Mpindyewu, s’udi mumanyè ne mèmè ncyèna mukumanyè. Amen.

326 Inābànzà udi paanyimà pèèbè menemene awu, ne cyùjà aci ku mukòlò, Mándèmwàzelè Brown. Udikù muswè kwitabuuja ne Nzambi neākwndòpe anyi? Udi umwèka utamba kuciyinga be. Mpindyewu, s’udi mumanyè ne mèmè nciitukù mwanjì kukumòna to kacya bāndela. Ku mukòlò wà dyābakājì aku. Mpindyewu, itābūùjà ne mwoyi wèbè wònsò, neúmvwè bīmpè.

327 Inābànzà ùteeta bwà kunyunga, ne ùdi ne binyòka. mbimuswike, bibi be. Mándàmù Fairhead, itābūùjà ne mwoyi wèbè wònsò, nènu keusangalè. Mpindyewu, s’udi mumanyè ne nciitukù mwanjì kukumòna kacya bāndela. Aci, kaa... [Mwanèètù wa bakājì awu ùdi wamba ne: “. . .mwondòpīibwe kumpàla. Nkàāvkwakù mwondòpīibwe kumpàla, ne ndi mumanyè ne neCingondòpè.”—Muf.] Amen. Èyowà.

328 Udi wītabuuja ne mwoyi wèbè wònsò mpindyewu anyi? Mpindyewu, cyèenzaYe ncinyi? “Yèyè neāngatè maalu āndi Mèmè munwāmbile aa, ne neānùleejèwu. Ne pashūshe Yèyè neānùleejè maalu ācīvwāvā.” Nudi bamòne cīndi muswè kwamba aci anyi? Nudi nuMwītabuuja anyi?

Mpindyewu twīnyikāāyi cyākābīdi mitù yètù.

329 Mpindyewu, wèwè uvwà mumanyè ne bu wèwè mwà kuumuka mu mwoyi wà pānu ewu dilòòlò edi awu, bwà ne uvwa mufwānyine kwikala. . . udi mufwānyine kwikala. . . udi mufwānyine kwikala, kwèna muledīibwe cyākābīdi to. “Muntu yèyè kāyi muledīibwe cyākābīdi to, kēna nānsha mwà kumòna Bukalenge to.” Bwà cinyi kanūyikù nulwa buludī *kaaba aka*? Imānaayi kaaba aka bwà tūnūsambīdilè, kaaba aka mene, ānu mu katanci kakesè cyanāānā. Nudikù mwà kuswà bwà kulwa mpindyewu mene mu Bwikadi bwà Nyumà ewu anyi?

330 Kanwākumònakù cintu kāmpanà cyà citāmbe bunènè cyènzeka to too ne panwāmònā Dilwa dyā Mukalenge. Mpindyewu, ikālaayi ānu bavūlūke. Ncyā bushūwà ne ndi mumanyè cīndi ngamba aci, cyanāānā Yèyè kāvwakù mufwānyine kufila mudimu wà bwambi ewu to. Kanūcīlekèdikù cīnūpīta mpindyewu to. Nudi ne meeji matòòke anyi?

331 Nudikù baswè kulwa anyi? Kabīyi nānku to, dībā adi, pankaci pèèbè ne Nzambi, mpādību bushāāle. Mèmè ndi mubingè. Ndi mukezūke ku mashi ònsò, bwalu ngānwāmbīdi Bulelèlā. Ngānūyiishī Diyī. Ngānwāmbīdi cīvwāYe. Ne Yèyè, pāākālwāYe, Wākajaadika cīvwāYe musangu awu; ne Yèyè ùdi wēnza ne mèmè njaadikè cidīYe mpindyewu. Yèyè ùdi umwèumwè ānu mùvwāYe musangu awu amu. Nudi nūcītabuuja anyi?

332 Nènu, mbaŋganyī bàdi babèèdi mwab’ewu dībā adi, kùdi bakwābò mwab’ewu bàdi babèèdi anyi? Elāāyi byanza muulu.



333 Mpindyewu tentèkèlàngànaayi byanza muntu ne mukwèndè, nènkù twètù tùnùsambididilè disambila dyà diitabuuja.

334 Mpindyewu ndi muswè kunùkonkakù cintu kampànda, mu cimùmà. Bu Nzambi, bu Nzambi mwà kulwa kwenza cishimà aci! Cishimà ncintu kampànda cidibo kabàyi mwà kuumvwija to. Mpindyewu, wèwè muswè kwela yònsò wa ku bantu bàdi mu nyùngulukilu emu aba lukonko, ùkabàkonkè, díbà kanà dyònsò ne mwaba kanà wònsò. Nwamònu anyi? Vùlukàayi ànu ne, n'Nzambi. Ebi bìdi ànu bìkèènà-kumònà byà twànàtwànà. Nganyi—nganyi, cidi cyènzà cyôci aci ncinyi? Nnwènù, nwènù biinè. Nwènù mbàdi bènzà cyôci aci.

335 Nudi numòna's, mukàji awu pàakalengàye civwàlù Cyèndè, Yèyè wàkamba ne: “Bukolè mbupàtùke mu Mémè.” Kàdi pàakaMuleejà Taatù bwà Lazàrò, ne Yèyè kuumuka kuya ne kwalukila, ne kubùisha Lazàrò ku bafwè apu, Kààkaambakù bwà “bukolè” to. Awu ùvwa n'Nzambi ùkwàta mudimu ne dipà Dyèndè Yèyè mwine, kàdi cikwàbò aci civwa mmukàji awu ùkwàta mudimu ne dipà dyà Nzambi.

336 Mémè ncyèna dipà dyà Nzambi to. Yesù Kilstò ngudi Dipà dyà Nzambi. Cidi ànu dipà cyanàànà didiYe mumpèeshe, mùmwè ne ndi mulediibwe mùshindù awu, mwikàle ne kandòndò kàà mwoyi ne ngiikàdilù wa umanya bidì bipitakanà (wa kumpàla awu) biikàle ànu pàmwè menemene. Kwèna uya mu tulù to; udi ànu ucimòna cyanàànà. Nyumà Mwimpè ùdi ùlwa pa kandòndò kàà mwoyi ànu mùdiYe ùlwa pa ngiikàdilù wa kumpàla wa umanya bidì bipitakanà amu. Yèyè mulwè pa kandòndò kèèbè kàà mwoyi, wèwè's udi mufwànyine kupeta cilòòta cyà nyumà. PàdiYe ùlwa pa kàanyi mémè, ncyèna mémè ndòòta to. Ndi ànu ntàngila kwàka ncimòna. Nwamònu anyi? Nènku, tudì tulediibwa, kwèna mwà kudivwija cintu kampànda cyà cishiilàngàne to. Udi mulediibwe mùshindù awu. Nwamònu anyi? “Mapà ne mabiikila kì mbyà dinyingaleela to.” Mbwa kwenzabi cinyi? Bwà kumwènesha Yesù Kilstò. Yèyè ùdi umwèumwè awu makèlèlè, leelù, too ne kashidi.

337 Ne byanza byènù bitentekelangana muntu ne mukwèndè, ndi mutwishiiibwe ne neuteekè mwoyi wèbè mu ditàbaleela dyà Nzambi mpindyewu mene ne: “Mukalenge, nkenkètèku. Nkàadi mulwè mukwàcike tukùlakàji ku bintu byà pa buloba, mu mùshindù wà ne nkàadi mpangila kumòna díbà dyà butùmbi didì munkaci mwà kupita edi anyi?”

338 Nudi bamanyè's, mùshindù awu ngùtùbi misangu yònsò. Ndi picile buludì mu èkèleeziyà, kàdi kabàvwakù badimanyè to. Aci mmaalù-malonda. Kanùdilekèdiku dipita to, nwènù balundà bàanyi, bwà kumòna dìyi dijaadikiibwa, misangu ne misangu, kumòna Dìyi dyà Nzambi òmwèneshiibwa, ne Mupersonà mwine wa Yesù Kilstò ùlwa buludì munkaci mwà


bantu aba ne wënza ànu menemene mùshindù wàkenzàYe kumpàla awu.

<sup>339</sup> Taatù wa mu Dyulu, ndi ngumvwa mpindyewu, Mukalenge, ne Dìyì Dyèbè ndibadiibwe. Bujaadiki mbufidiibwe. Nyumà Mwímpè mmupwekè ne mushindike Dìyì adi ne bwinè bujaadiki abu. Mpindyewu bwalu bùdi mu byanza byà bantu aba, Mukalenge. Bùkaadi mbwàbò bujitu bwambula. Kakwèna cikwàbò cintu cìndìku mumanyè bwà kwamba to. Ne mèmè ncyènàku mumanyè cintu cikwàbò nànsha cimwè cyŪdi mufundè mu Dìyì, cyŪdi mufwànyine kwenza to, bwalu Ukàadi mumanè kubòndopa. Cidi ànu mbwà kubàfikisha ku diciitabuuja. Ne Wèwè wenza cintu bu nùнку ewu, kàdi mmunyì mutùdiku bafwànyine kwela kàbìdì mpatà? Mmunyì mutùdiku bafwànyine kàbìdì kwanyishila Sàtaanà bwà kutungunuka ne kukwàcisha kondò kèètù kàà mwoyi tukùlàkàji?

<sup>340</sup> Sàtaanà, ndi njikula dyondopiibwa edi pa bantu aba, ne nkwambila ne: “Ndi nkutùmina dìyì, mu Dìnà dyà Mukalenge Yesù Kilstò, pàtukà mwab’ewu. Pàtukà, mu Dìnà dyà Yesù Kilstò, ne lekèlà cisamba eci cìye.”

<sup>341</sup> Mpindyewu, nwènù baMwitàbùùje, juukilaayaaku kuulu. Nudi nwitabuuja anyì? Imànyinaayaaku kuulu, ne nùpaayi Nzambì butùmbi. Juukilaayi kuulu nucitàbùùjè. Kanùcyèdiku kabìdì mpatà to.

<sup>342</sup> Mu Dìnà dyà Yesù Kilstò, Nyumà Mwímpè àtwadilèku cisàmbà eci disànka, bukolè, dibìikà dyà ku lufù, ne Mwoyi, Mukalenge.

<sup>343</sup> Mupàayi butùmbi mpindyewu, ne bèneshàayi Dìnà Dyèndè dyà cijila. Tudi baMunangè. Tudi tuMutùmbisha. Tudi baMunangè bikolè, udi kàyi kwambangana Nendè, Wa Cyendèlèlè, Mwànà wa Nzambi udi ne mwoyi. Mu Dìnà Dyèndè, Mwakidìlaayi. Yèyè ùdi kaaba aka. Amen. 

*NYUMÀ WA BULELÈLÀ* LUA63-0118  
(Spirit Of Truth)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diitânù dilòòlò, mu matùkù 18 a ngondo wa kumpàla, cidimu cyà 1963, mu Church Of All Nations mu Phoenix, Arizona, U.S.A. Ndyumusha pa mukaba wa mêtù ne dituuta ku cyamu mu kaabuujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)